



柳田文庫
文庫11
D 191
4

雨考軒四



文庫 11
D 191
4

柳田泉文庫

010190555890

武進黃景仁

兩當軒集卷第十三

武進黃景仁著

古近體詩六十九首

丁酉正月四日自壽 是日同壽者有溫景萊朱大尊楊荔裳共余四人溫舍人

汝适為置酒借舫齋中

綵箋分擘燭分持四座交成自壽詩元子敢誇庚午順 余

午時郎中多恐甲辰雌青蒼路迥誰先達草木年深我自悲

作客喜逢賢地主今宵杯至總難辭

不禮金仙禮玉晨 雲笈七籤正月四日朝玉晨君 人間差覺做精神倘來

事業慙青鬢未了名心為老親花笑喜逢初番信酒香

釀隔年春相將且盡筵前醉位置吾儕豈在人

集十三

十四夜趙舍人秉淵招集酒後偕步燈市

何用樂人海所得惟友朋況復美清夜人月輝華燈花園
錦障妙歌舞不如尊前聽吳語天廚玉饌觴淥醑不如促
坐嘗南京月圓未圓月逾皎春深未深春更好眼芒旋落
酒暈奇談綺烘成燭花巧紛紛上座先得詩罰依金谷我
不辭酒腸窄已成小戶文陣怯敢當偏師半酣起踏六街
去十萬銀龍落星樹香車寶馬如流泉華心未灰撩更然
酣嬉遊冶不足道養得性情猶少年分手銅街曉鐘起今
歲今宵樂如此

聞穉存丁母憂

故人新廢蓼莪篇我亦臨風尺涕懸同作浪遊因母養今

知難得是親年絳帷昨侍文宣講大被曾隨宗少眠自視
生平愧猶子束芻難致路三千

爲撫孤雛力已殫與君兩小識辛酸冰霜只合顏常駐消
息驚聞膽竟寒一日尙存休滅性千秋有業抵承歡阿蒙
哭下還依舊他日登堂欲拜難

烏巖圖歌爲李秋曹威作

烏爾何來爾胡不向朱門大第啄梁粟又胡不向荒郊敗
豕飽腸肉胡爲只向蒼蒼之林幽幽之山亂石犖确飛泉
潺湲蕭涼幽闌人世不爭處爾乃烏烏啞啞下上於其間
爾亦不畏羽林彈爾亦不接行人丸爾亦不坐秦氏桂爾
亦不萃曾參冠飛飛不出此山裏朝飛向日晡飛還巢中

老烏畢逋尾一年生有八九子子出望子歸得食聲則喜
嗟爾烏爾昔初作黃口雛張口待食爲爾心力痛今乃羽
翼成長羣飛叫呼爾今反哺爾樂何只且林之深兮翳不
疏山之娟兮腴不枯下有一人儻然臞平生慕烏愛烏而
敬烏效烏反哺烏不孤聽我歌作烏巖圖

題李南礪啖荔圖

李名文藻歷任廣東知縣今將同知桂林

嶺南吏隱足清娛親與仙人解絳襦前有東坡後南礪他
年合作兩髯圖

李多髯

枝頭風露飽瑤漿不噉酸甜噉色香白足蠻童唱天半摘
來應勝黑衣郎

我最清饑不自由何年眞作海南遊多公更訪炎州桂此

味還當進一籌

又題其曝書圖

積帙晴窗偶一開手披魚粉出秦灰願分太古九枝日更
曝胸中萬卷來

根柢辭章古難合儒林循吏況兼諸誰從杜庫曹倉外想
見先生所見書

移官只載中郎竹去越何來陸賈金見說賣書方就道知
君不負十年心

將遊西山道中寫望

花風十里漾晴暉初畧平原擁翠微兩載城中勞拄笏今
朝馬首快褰幃穿林客聽離畱住上塚人騎款段歸除卻

天邊塵一綰江南風景亦依稀

帝里烟花已倦吟得閒聊復快登臨漸來車馬無聲處忽
與雲山有會心曠日金浮琳宇亂濃春青潑塞垣深此閒
大有蒼深境明發芒鞋仔細尋

夜宿西山下偕馮九健一

杖策相從似夙因草堂促膝意相親春山無伴應憐我村
酒能沾更泥人牆下雲根連洞壑樹梢簷角掛星辰向禽
有願終當了只要天公許乞身

八山至戒壇

一峯蹲怒獅突補山口缺度峯十八轉轉轉得奇絕森疑
仙困排杳望化城列雲木散巖澗風水糾洞穴一徑辨懸

雷丈枉尺以折行人如蠹絲樹杪乍明滅眾峭忽一束前
山豁焉裂中藏法王宮締構一何傑金碧欲動搖隨山現
凹凸遐哉何王構人巧覺山拙入寺生晝寒聞梵了塵熱
真戒如我傳終辨領禪悅

登千佛閣

珠閣望岩堯飛蕘切星漢正對兩崖開百里羅几案迢遙
俯

帝京鬱爲神皋冠星星辨金紫隱隱開宮觀蒼然五陵色
天風吹不散歌鐘開車馬喧聲徹雲半一掬人海波飛沙
沿無算三折流渾河怒決奔雲亂萬弩攢流澌半塊隱遙
岸羣山太行來出塞青不斷佳處一縈結復此丹閣煥憶

昨鳳城頭旦晚支頤看今茲遂登臨彌愴星物換風抱出世心對此能無歎拍檻如可騰吾期從汗漫

戒壇四松歌

我聞靈巖異松號千尺西來聖僧曾手摩蒼官本自足仙骨更愛佛地棲枝柯今之四松毋乃似閱盡四朝同利那以靈慧種植淨土法雲甘露滋其和怒張牙爪斃獅象俯受戒律儕祇陀千劫不壞如立鐵一絲莫望無緣蘿戒壇高已出雲半茲松直欲摘星河只疑四海龍排空行雨如投梭忽然天風度花雨飄何多吹香滿院飯僧徧沈沈古殿鳴春鼉山深夜永足精魅翻經倒幢誰敢訶定知我佛幻此等游戲怖走百怪除么麼不須菩薩作變相髑髏繞

身同綴螺不須金剛怒努目手揮長劍塵羣魔但教此松屹立一萬古那怕竊鉢來旬波戒神千百對此盡讐息諸天星衛空駢羅交枝靜巢說法鳥偃蓋下蔭聽經鶯香廚寶藏鎮相守厯久龍性全消磨亦憑佛力得降住不然久已騰擲變化歸無何

足疾發不得登極樂峯

茲峯不合名極樂遲我登臨坐緣薄臥游且覓宗少文未到中年病腰腳山中猿鶴休見哈髀肉已生心未灰此情惻愴誰得似如闕寶山空手回

移家來京師

豈是逢時料偏從陸海居田園更主後兒女累人初四海

謀生拙千秋作計疏暫時聯骨肉邸舍結親廬
全家如一葉飄墮朔風前事竟同孤注心還戀舊壚妻孥
賃春廡雞犬運租船差喜征帆好相逢澤潞邊
長安居不易莫遣北堂知親訝頭成雪兒驚領有髭烏金
愁晚爨白粲困朝糜莫惱啼鴉切憐伊反哺時
江鄉愁米貴何必異長安排遣中年易支持入口難毋須
怨漂泊且復話團團預恐衣裘薄難勝薊北寒
當代宋公叔謂筭河先生憐才第一人傳經分講席傍舍結比
鄰桂玉資浮產盤餐損俸緡移家如可繪差免作流民
貧是吾家物其如客裏何單門餘我在萬事讓人多心跡
嗟霜梗生涯辦兩蓑五湖三畝志經得幾蹉跎

都門秋思

樓觀雲開倚碧空上陽日落半城紅新聲北里迴車遠爽
氣西山拄笏通悶倚宮牆拈短笛閑經坊曲避豪驄
帝京欲賦慙才思自掩蕭齋著惱公

四年書劔滯燕京更值秋來百感并臺上何人延郭隗市
中無處訪荆卿雲浮萬里傷心色風送千秋變徵聲我自
欲歌歌不得好尋騶卒話生平

五劇車聲隱若雷北邙惟見塚千堆夕陽勸客登樓去山
色將秋遶郭來寒甚更無修竹倚愁多思買白楊栽全家
都在風聲裏九月衣裳未剪裁

側身人海嘆棲遲浪說文章擅色絲倦客馬卿誰買賦諸

生何武漫稱詩一梳霜冷慈親髮半甌塵凝病婦炊爲語
遶枝烏鵲道天寒休傍最高枝

贈陳秋士

吾儕一聚散造物巧掄弄君昔遊燕初河梁一相送輾轉
三年閒合此離襟縫我今客作家君猶作鄉夢相依若性
命相愛儼伯仲我識君苦淺君視我殊眾連牀燭一枝入
市轡雙控歡意與淡俱交情爲貧重前衢溢華驄後巷飛
絲鞵置身塵熱區心兵拔不動君性更簡夷談言每微中
能於廣座中一語寂羣鬪風致菊豔霜詩境梅破凍蓮思
火地開蘭擬幽谷種何物可贈君騷香爲君誦更感拜母
情助以菽水供投布識范寒分金補顏空相對茅檐中酣

歌時擊壤爲樂曾幾時小別得毋惘膠漆雖不離蹉跎孰
爲其各曰有親養豈免爲人用君得賢主人羣籍互穿綜
時爲四庫總校楊
懋珩延校官書得淥乃泛藁非高詎棲鳳所幸我輩交
不貴屢過從聚非青蠅集散異市兒哄脫閒命駕來相期
恕疏縱

偕王秋塍張鶴柴訪菊法源寺

懊惱心情薄醉宜討秋剛趁晚涼時今年何事堪相慰不
遣黃花笑後期

佛地逢人意較親灌畦老叟面全皺於今花價如奴價可
惜種花人苦辛

身離古寺暮烟中歸怯秋齋似水空暝色上衣揮不得夕

陽知在那山紅

懷映垣內城

冷雨疏花不共看
蕭蕭風思滿長安
虛堂昨夜秋衾薄
隔一重城各自寒

送趙渭川歸羅浮

燕山九月北風厲
殘客紛紛整歸騎
誰復能爭豎子名
可憐短盡長虹氣
君亦告我歸故林
我爲君作還山吟
還山之樂樂曷極
誰使天南客天北
目斷飛鷺嶺上雲
心枯玉女峯頭石
朱明霞氣成樓臺
彩衣鳳子迎君來
夢成好續師雄後
書就還教葛令裁
如此家山信堪戀
君倘不歸我亦勸
我作長安送客人
何時亦了還山願
此去山中多白

雲莫從眾裏苦嫌身
倘逢過嶺梅花使
好訊荆高市上人

聞鄭誠齋先生主講崇文書院寄呈二首

講院風連曲院清
蕭閒巾履恣經行
湖干花鳥參經座
橋

下龜魚識杖聲
送酒恰逢賢太守

謂邵閣谷先生時守杭州論文偏愛

老諸生人倫風鑑饒
辛苦不爲龍門一代名

浪遊京洛困塵縑
慙愧生平國士知
梁苑鄒枚空綴賦
韓門郊島例窮詩
每多未了嗟生拙
敢以無才說數奇
常共衰親向南望
手拈香瓣話恩私

送毛佩芳明經歸遂安

家臨清練足詞源
魯趙論詩舊業尊
才喜正平逢薦鶻
仍驚東野賦聞猿
道心已長琴三疊
世態頻傾酒一樽
先著

歸鞭君計得白沙翠竹滿江村

九月初二日曉雪

九月卽飛雪悲哉北地寒風愁傾碣石冰欲合桑乾濁酒誰同貫征衣我最單蕭條眇衢巷何似在長安

重九夜坐偶成

香甜飯飽粟千房病眼看花也白黃五度客經秋九月一燈人坐古重陽霜蟲類訴夜寒壁鄰樹忽飄風過牆還向衰親添笑語恐驚時節在他鄉

偶遊僧舍見有題惡詩於壁者姓名與予同戲作慕藺何曾效馬卿小冠子夏偶同名不妨姓氏供人借只怕詩篇過客評門戶文章雙李益清明寒食此韓翃生平

未賦瀟湘景廁鬼無煩爲不平

夜坐示施雪帆

不嫌蓬華共蕭辰對榻經旬意較親笑我在家仍在客與君憂病勝憂貧虛傳薊北黃金賤自別江南白髮新幸有一椽堪寄傲底須狂趁六街塵

丹黃舊業掩行滕欲寫長箋研簇冰繞座殘花猶影壁打窗乾葉似窺燈飢來客尙憐窮鳥癡絕人還笑凍蠅襪被依依兩無寐昨宵寒思已難勝

再疊前韻

等閒憔悴過花辰藥裏吟囊強自親金盡豈憂才共盡家貧爭奈學尤貧頻驚吳下酒徒散冷笑長安弈局新藉爾

九
瑤枝慰飢渴不教腸胃久生塵
鎮日抄書展篋膝吟髭撚盡欲凝冰霜清已白邊頭草秋
老先青壁上燈坐怯臨窗塵似馬居嫌近市客如蠅蕭蕭
風色愁如許不聽燕歌已不勝

送温舍人汝适歸廣州

舍人弱冠登華省雞樹翩翩鵠棲影紫薇直退書自抄紅
藥吟成燭猶秉長安甲第如雲高但覺舍人官獨冷將金
作勁玉作寒似鳳聲清鶴聲警前身合是羅浮花吹送寒
香過庾嶺我昔獻賦來田閒骨節疏頑性孤鯁片言脫口
眾已驚一詩投門君獨肯開樽下榻百不嫌勸學分餐一
何幸閒披墨妙登寶臺快接談源助修綆雅量如君有幾

人對君自失波千頃十日闕晤如經秋四載彌留共清景
朝來黃氣忽上眉告我

君恩許陳請三百名中未見收八千里外將歸省我在長
安屢送人只有送君殊耿耿交情豈復爭聚散天意有如
憎合併君去江南只半程卻過吳蒙舊鄉井憶別君應念
故人移家我已同浮梗里中亦有數子才

謂稚存
淵如心雄語

健氣力猛扁舟倘作半日停乞爲寄聲勞引領吳天遙拍
楚水長嶺樹平開越山靚一路題詩到海南定比來時更
道整未能免俗期丁寧後歲來看曲江杏

丙申冬于王述菴通政齋見鄺湛若八分銘天風
吹夜泉研爲作歌今翁覃谿先生復出鄺書洗研

池三字搨本與研銘合裝屬題池在廣州光孝寺
鄺讀書處也先生視學廣東曾訪之

海雪天風夜泉研昔在瑯琊座中見酒酣詩成飛雪片山
鬼湘娥來變眩今晨北平學士堂八分三字懸中央方知
此研所洗處亦有巨筆含風霜字較研銘數浮二分尺殊
量體同製磊磊撐天拄地形涓涓桂懼荷衣淚相傳讀書
處乃在訶子林沈沈禪窟森晝陰一池黝碧映深刻至今
雨落風蘚不敢相欺侵輕勻麝煤搨蟬翼載以星輶返京
國忽然一夜天風吹此研此書成合璧嗚呼畸人身後仍
有神遺蹟解付千秋人泠泠哀玉扣之若我應欲問二琴
無復存我詩再鼓筆不振點畫空以指爪捫倘分一滴池

中潤墨花怒捲垂天雲

輓李南礪

去年隨計上

皇都四十功名半刺初經術共知推次仲文章誰薦似相
如壁閒墨褪初來札篋裏塵封未竟書貧累一官拋歲月
名山回首重欷歔

吾道頻年氣死灰海陽新塚亦成堆

謂戴東原

幾曾白髮窺晨

鏡忍向青山覓夜臺瘴癘多時消病骨蠻荒終古殉奇才
一棺百粵歸何計可有同官爲醜財

惡疾驚聞似照鄰夢桑生井亦前因

年四十八

瀕危尙遺千言

牘作傳都歸一代人

臨終時神清甚作遺囑以傳誌詩諫之事分屬某某皆得人

桂嶺

生祠爭涕淚蓬山舊隱已荆榛終知身後名何益羨爾逍遙獨反眞

叢竹圖爲金光祿素中題

金兄弟三人圖以寓意

脩竹本嘉植一根生百叢上枝棲祥鸞下根盤游龍金家三兄弟友愛出天性翩翩聯雁行亦如竹斯盛是用取乎竹手栽都作林中有屋數椽並坐還聯吟憶昔誦風詩未究作詩旨葛藟生河濬束楚流揚水杖杜葉涓涓棠棣華韡韡亦或譬艸木于斯胡闕諸君乃廣詩義作此叢竹圖竹以叢益茂叢則竹不孤我爲徵竹典開元有遺事苑竹數十叢牙筍不相離感彼同心名竹係以義彼生帝王家豈與士夫異它曰孝曰慈殊軌亦同致方知此圖作用

意與古期田氏稱同根謝家賦連枝瓊芳而蕙茂蘭發斯玉暉較之此圖中彼皆成濫詞況君伯仲間不我眾人遇示我華萼篇勝披連珠樹梧桐識相徵杞梓重文譽會看嶰谷材飛聲作韶濩披圖意未已益我長咨嗟譬如特生竹隻影誰周遮轉傷末俗偷本撥傷萌芽莫慘然豆萁莫怪歌梅花同氣且如此遑復論其他我願舉世人家產一叢竹俾看枝葉茂相與感心目更吹比竹聲墳簾和相逐三歎還君圖此願何由足

題汪民部秀峯詩集

積寸心香裊玉糝雪青霞紺見瑰辭水曹例合歸風雅武庫才應領度支

頃從工部轉戶部

金石文章關掌故炎琴姬扇感

心知時方集刻

閩閣詩

一編自有千秋在餘事分明亦我師

輓毛明經佩芳

生別不經月凶音忽到門竹閒杯尚在石上坐餘温起

今年夢來來何處魂芙蓉城作主樂矣復奚論去時偕吳

同舟云初病時便夢坐石案判事旁有披髮

二僮侍日後目光常瞪如像設狀數日而卒

一領明經薦頻沾入洛塵厭煩常刺促失意更艱辛黃卷

悲生事青山奪故人臨窗看風葉悽絕此蕭辰

冬日書悶

智不周身似挈瓶且營斗室養黃寧商量紙價添窗榻料

理薪材暖竈陘雨滴槽牀傾蟻白霜消屋瓦現螺青飯餘

好趁南榮曝怕有人過喚掩扃

疊韻呈筒河先生

家具寒餘爨足瓶曉披蝨簡提青寧澀詩挽舸衝奔瀨險

夢驅車度絕陘林杪雪粘烏項白寺門山映佛頭青街東

幸有談空叟不待披衣已叩扃

曉晴三疊前韻柬徐惕菴

曉看微凍解銀瓶怪底宵來睡思寧簾角日拖西陸尾牆

頭山走太行陘冷淘半盞楊花白凍飲三升竹葉青問訊

南州老詞客一篇詩就一敲扃

三忠祠

在東便門外祀諸葛武侯岳武穆文信國

羣公元氣在星辰我識三忠是一身太息同聲悲國步蕭

條異代識宗臣若徵史傳言徒贅略近祠堂草不春多少

樓臺費金碧此閒風雨暗承塵

漢吉羊洗歌在程魚門編修齋頭作同作者蔣新

先生吳穀人陳伯恭兩編修

說文羊祥字通訓證之元嘉刀銘始銘曰宜侯王大吉羊今聞吳門

陸超曾復得漢時吉羊洗始知隸釋言非誣漢器惟多紛

莫紀吉祥卻用吉金鑄銘文耿耿出殊理吉作尚各輸一

畫作薤垂獨別諸家出波詭早吉倒置方寶獻獻文吉洋

祥混書古老子古老子祥作彭與古尚書洋字同文此同繆篆非古文亦復

新奇堪備體我聞洗制尚三尺承盤滌爵秉周禮如壘受

斛徵有圖鱗蹙花翻鑿在水周製渾淪多不銘陽嘉紀年

書兩耳上陽宮出亦有字長宜子孫誦詞美曰富貴昌宜

侯王用意差與吉祥比尙嫌錯雜麟駝形卻於銘義了無

似同文合意斯獨精於眾洗中得觀止雙關略比爵象鵠

百罰非同尙模兇流傳彷彿神靈呵想見摩挲土花紫更

聞天子用金諸侯銀茲之銅用大夫是彼稱富貴侯王云

等屬紛紛諛詞爾疏經自有虎觀儒吉羊洗歌歌止此

三疊夜坐韻

一年已過雁秋辰惻惻窮交久更親不學耕偏愁歲儉欲

歸樵卻怕山貧寒深老屋燈逾瘦病起閑門月倍新散帖

半牀休檢點愛它鼠迹滿凝塵

更無新醞倒黃滕愁對簷牙一尺冰試汲井花清眼膜要

分蘭氣養心燈苦吟繞屋如旋蟻醉墨書牆忽散蠅杜甫

荒齋茅牘幾再經風後恐難勝

題施錫蕃雪帆圖四疊前韻

歸帆一葉阻霜辰忽忽披圖意與親急雪溪山同寂寞孤
舟天地入清貧欲隨塞雁兼程去早趁江梅照眼新此景
休嫌太悽絕可知不到軟紅塵

素友寒宵展畫牒分明呵筆欲成冰

圖者余少雲

添君風雪三

更夢老我江湖十載燈紙上歸心爭快馬圖中冷意辟癡
蠅不知此願何由遂擁鼻吟成恐不勝

筇河先生見次原韻復疊二首

誰言詩客動星辰若解憐才與我親一任人嗤難作客藉
非公在肯言貧諸生聽講談皆進老輩論文樣不新自擁

書城掩關坐不知門外有車塵

笑口何因忽破滕敲詩如碎一盤冰梧桐葉盡人聽月薛
荔陰空鬼拜燈五夜吟風賡砌蟀頻年鑽紙效窗蠅他時
倘蠟登山屐負橐相隨力尙勝

六疊前韻和余少雲作

故交零落感參辰青眼相逢訝許親雪後我方連日臥客
中君亦舉家貧消愁酒醒愁依舊疊韻詩多韻斬新尙有
狂名堪作達不憂甌釜慣生塵

隨身畫幘共吟滕閱得燕山一窖冰廿載行藏羞滅刺兩
家骨肉笑圍燈避人偷作文彈鼠厭俗頻將劔逐蠅莫話
單寒向行路季裘雖敝尙能勝

王述菴先生招集蒲褐山房觀劉貫道蘭亭禊飲

圖作歌 卷尾書至元六年春中山劉貫道畫

永和觴咏誰能繼蒲褐山房夜高會羣屐都饒晉代風風
流本屬王家事酒酣燭樹光模糊潑眼見此蘭亭圖悠然
坐我此亭上和風清氣來吹噓橫綃七尺何不有中山劉
郎寫生手名士爭摹馬渡餘苦心為落龍眠後 李伯時亦有禊飲圖
見畫譜亭陰背山面流水亭中主客竟誰是倚欄一老觀鷺
羣渺然若逢情所欣吾知此是王右軍一人偏右岸巾幘
若為蒼生動顏色不絲不竹情不歡此是東山謝安石一
人據案坐上風若欲自命為文雄彷彿應是孫興公當年
作詩復作序似在慘淡經營中其餘醉醒行坐亂無次一

一皆具點睛勢或吟或飲或笑嘖不一雷同各生氣最後
一客依修篁擁虎皮坐神激揚脫非謝散騎合是袁龍驤
四十二人盡名彥何必皆詩皆有傳士女空誇洛水游旌
旗卻笑華林宴古來文讌此獨尊亦憑此畫方傳神後來
貫道圖裕陵隆準日角龍為真真龍貌得猶易易能貌此
者嗟何人我聞伯駒先時亦有作吾家文獻歎錯愕 語見黃文
獻集跋趙伯駒蘭亭圖卷謂其纖毫微密極盡神試較龍眠定何若那
得三圖風雨倏合并各出精靈門強弱不須望古窮幽探
筵前名士皆東南我公文章經濟赫為
盛時出不比典午末造無益惟空談後來好事作真蹟莫
畫當年畫今夕

雪意

非因裘薄更衾單坐不生溫臥豈安先冷指尖如有信忽
生膚粟似無端瞻瓶欲逗冰花垢獸炭微凝火暈寒豫屬
兒童休擁篲階前畱得盡情看

兩當軒集卷第十三

兩當軒集卷第十四

武進黃景仁著

古近體詩七十三首

癡兒

索栗憐通子牽窗厭衮師天心憎早慧不敢怨兒癡

雪後集陶然亭先歸道登黑窯廠

城南有高亭亭與城相向城雉銜西山巒巒走青嶂殘雲
時一白破碎失山狀對山開長筵興酣酒力王中有清氣
通道然發高唱入座皆俊物能容我跌宕轉嫌眼界窄三
面礙屏障欲撤不可得悄焉思遠颺疾覓快馬騎徑去不
復讓豈因困酒逸畧似放翁放一里得高臺于此足遼曠

野風四面合始覺所居九尺五韋杜天幕我作行帳城遠
隨野闊一線空烟漾入雲翻凍旗暮角隱悲壯北眺瓦一
垤萬戶走鱗浪倏被暝色催幾處遠燈亮九門將傳鑰三
殿久散仗而我此徘徊清絕轉悽愴回憶亭中人不見此
臺上興至各有適何必兩相望撫景傷我心願託陶家葬
去去應復來行行重惆悵

集吳香亭太常齋見所藏孫雪居董香光書畫合

冊作歌

董書唐人五七言絕
句八幅孫爲補圖

人言詩妙畫難盡我言是詩皆畫境人言書妙從畫參我
言畫亦書理兼雲閒董尚書書法昔無敵揮寫唐人五七
言金壺汁破霞賸色漢陽太守孫雪居力追詩意爲補圖

忽忘筆墨在何許時見雲烟空欲無咫尺何論萬里勢蕭
瑟蒼茫極能事是書是畫兩不分呵成一片青霞氣漢陽
烟樹連晴川兩公宦遊爭後先我亦樓頭訪崔顥昔人不
見心茫然古今多少登樓客名籍誰應跨鶴仙太常先生
重毫素不薄今人尤愛古寒宵觴客觀寶臺墨光酒氣相
旋舞我於斯事罕一優不嫌百讀指昏眸祇今墨妙知誰
似俯仰人間二百秋

余伯扶少雲昆仲施大雪帆消寒夜集分賦

今歲不甚寒微寒消更可招邀皆寄公謀飲先及我呼兒
下簾衣促坐圍地火薄具當候鯖錯列只蔬蔬脂腸鮮花
豬實核慙韭卯苦酒傾百升不醉腹轉果停尊念舊雨太

半散江左我輩如轉蓬復向燕雲墮商略身世事百法欠
帖妥且復永今夕切勿話瑣瑣基劣勝固欣詩好拙亦哿
卽此足相於那覺在塵堞後會宜頻頻不爾愁則頗

借少雲雪帆小飲薄醉口占

同是江南客天涯結比鄰鄉山燈照夢凍面酒回春詩到
十分瘦名傳一字貧若繩三尺法我輩是游民

寄維衍

偏從京國坐羈窮歲儉全家飯二紅舊業已經拋竹北故
人常似隔星東夜窗燈翦連牀雨曉閣帆開醒酒風此景
幾回成昨憶輸君吟斷水雲中

夢回長樂起鐘聲心事慙乖鷗鷺盟苦憶梅花尋廟市愁

隨鴻信到江城移家葛令圖雖就拔宅淮王術未精君念
北堂應及我早將消息寄難兄

時令兄蕙莊亦
奉母居京師

題周上舍愛蓮出關詩後

吳儂生長水烟柔誰識盧龍萬里秋才到
上京方可賦山看絕塞始言游但教珠玉常盈抱便有冰
霜不上頭對此自慙飛動意艸堂風雪看吳鉤

次韋進士書城見贈移居四首原韻奉酬

旅食歡游少蕭蕭閱歲華有牀眠曲尺無雪賦尖叉薄笑
三辰酒穠羞一窖花如何此爲客常似未棲鴉
詞壇見韋虎餘子盡摧顏世以科名重天分歲月閒讀騷
宜飲水拄笏且看山一接清塵末因之破俗壑

晴光披煥襖雲色斂灰稽有客開荒徑期君話冷齋閒居
偏近市小飲愛臨街幸有論文樂長安住亦佳

兩年經再徙何處是吾廬門換新粘帖囊攜幼讀書留賓
猶有榻奉母每無魚慙愧投詩意相將賦卜居

送馮魚山庶常歸欽州

城南昨與溫子別箕披掩關兀兀愁連旬如形逐影恃君在
君亦望雲懷苦辛館閣諸公愛才切欲爲東觀留詞臣連
章累抑乞歸疏刻意爲阻南征輪君方坐歎我竊喜大如
助我羈故人朝來排闥忽相告

帝俞所請頌

恩綸九千里路自此別君復舍我悲奚論四年聚首不爲

暫我懷鬱鬱常未申君才蓋世挾殊藻豈獨珠海稱奇珍
異才自古產遐裔如漢揚馬來峨岷西江詩派一口吸卻
疑涪翁之後身我無筆力愧衰葉得君並世氣乃伸清河
弱弟亦穎妙相隨讀書相對貧玉堂天上坐吟獻不省京
洛多風塵投詩未答豈敢後譬圖嵩岱難爲真今將作別
詎能默忽忽清淚沾盈巾去年移家至都下傭書僦屋炊
桂薪君如東方亦乞米卻於賤子勞指困一身苦爲故人
累彌畱欲報淹茲辰君今行色亦草草誰與聚帳分俸緡
日南去路始天北殘年載途歸暮春錦衣豈羨故鄉樂無
服先拜高堂親山屏五色開雀尾海光萬道浮龍鱗還家
信樂送者苦辦有魂夢隨途津相思與會曷有極晨是月

夕風之晨遙知温子卸裝久經過一語煩相詢嶺頭不少
北來使望寄書札來頻頻

張鶴柴招集賦得寒夜四聲

負擔爾何物淒聲絕可憐正逢說餅客坐憶賣餠天踞夜
疑宵警臚名惱醉眠滑城休更唱不值一文錢賣聲

虎旅傳何早嚇更報漸深敲殘三市月迸裂五更心霜重
聲逾脆風高響易沈轉思秋館夕斷續閒清砧柝聲

不識林中寺誰尋月下蹤湖音初浩蕩塵夢一惺忪古殿
驚棲鶻空壇擾怪松千花真有藏我欲叩南宗梵聲

水宿愁喧碓村居怕聽春如何近朝市此響亦相從才愧
葬能受身慚庶共傭聲聲殷幃闥遠寺又撞鐘維聲

蔣心餘先生齋頭觀范巨卿碑額搨本

憶昔北上經金鄉車檐不捲臥且僵忽如有人促我起道
旁碑書巨卿里慨然懷古雙眼明欲爲一詩迄未成乃今
見此墓碑額似索心盟話疇昔直是生平死友心上作星
芒墮爲石碑穿已失文不完此石亦沒蛟螭淵龍門坊口
披沙得離垢菴中剪燭看心餘先生齋名青龍三年此碑設鄉人
翟循縣君薛冀州事與范史殊名伴亦補酈注缺渾淪製
少盤螭痕精堅體仿玉筋文黃初諸刻孰優劣以殿魏碑
差得真文云枯斃潤荆漢治郡威名事奚案世亂方矜獨
行名名高不必循良傳到君章與邢子真欲爲死友適得
生張元伯後陳平子縱不生交亦堪死不知君死友者誰

身後百年開此碑滄桑不爛西山石陵谷如含峴首悲過
眼雲烟欣落手願抱此碑同石友髣髴空中走素車來共
風前一杯酒慙愧生平結客遊山陽空聽笛聲愁南歸定
下墳前拜埋骨期分土一邱

元夜獨登天橋酒樓醉歌

天公謂我近日作詩少滿放今宵月輪好天公憐我近日
飲不狂爲造酒樓官道旁我時薄病臥仰屋忽聞清歌起
相逐心如止水遭微颿復似葭灰動寒谷千門萬戶燈炬
然三條五劇車聲喧忽看有月在空際衆人不愛我獨憐
回鞭卻指城南路一線天街入雲去攬衣擲杖登天橋酒
家一燈紅見招登樓一顧望莽莽何迢迢雙壇鬱鬱樹如

薺破空三道垂虹腰長風一捲市聲去更鼓不聞來麗譙
此樓此月此客可一醉誰共此樂獨與清影相嬉遨回頭
卻望望燈市十萬金虬半天紫初疑脫卻大火輪翻身躍
入冰壺裏謫仙騎鯨碧海頭千餘年來無此遊不知當年
董糟邱天津橋南之酒樓亦有風景如茲不古人不可作
知交更零落少年里閑同追歡拋我今作孤飛鶴不知此
曹今夜何處樂酒盡悲來氣蕭索典衣更酌鷓鴣杯莫遣
纖芥填胸懷天上星辰已堪摘人間甲子休相催然藜太
乙遊傍誰吃齋宰相何人哉甕邊可睡亦逕睡陶家可埋
應便埋只愁高處難久立乘風我亦歸去來明朝市上語
奇事昨夜神仙此遊戲

正月見桃花盛開且落矣

紛飛紅雨欲漫天不信東風此地偏才報春來曾幾日忽
驚花落又今年半生每恨尋芳晚萬事都傷得氣先寄語
漁郎莫相過早逃蜂蝶去遊仙

卽事

去年一冬乾不雪亦不雨逮今年正月暄暄似微暑可惜
多裘翁揮汗強服禦頗感造物仁曲貸寒士苦轉恐春氣
回鬱熱肺病舉驗之今果然喘嗽雜噦吐方知天難爲物
微易失所有客南方來異事爲我語官河徹底冰大雪十
日五龜手病老農墮指苦行旅問之百歲翁此景云未覩
我謂客無詫天意固有取熇互宜攬勻坎離要填補陽海

冰反凝陰澤火亦聚雪嶺攢浮蛆炎山攫飛鼠變化爲生
門錯綜乃道戶况生東南人柔脆太楚楚鍊以冰雪威骨
健可撐拄聽言客听然我病亦似愈開窗訝庭柯風色轉
少女將無雨意來中宵一延伫

明日遂雨

昨詩似病天不雨曉聞瓦溝戛玉如方知是物有時有頗
願此聲無處無薄寒繞座聊頓袖細點入窻頻徒書何當
逕放舟一葉五湖三江看跳珠

題陸耳山學士家藏明陸文裕公書玉薜詩卷

椒蘭本香草靈均感數化方知騷人旨寓物每多假文裕
名儒臣榷梓比聲價胡於日及花歎詠百從借撫卷一沈

思其笑乃勝罵奄瑾方煽逆中外遭恐嚇一朝出陽曜若
若冰山卸彼瑾何如槿榮落孰久乍公時賦閒居辭氣整
以暇或以喻調羹味可枌榆山谷詩吾聞調權羹異味及枌榆否或道
生氣易植勝桑柘抱朴子木槿生之易者玉以美其色不比朱顏姹
宅年立朝節於此徵蘊藉官因桂萼左薦者桂州夏同桂
而異臭物理信堪訝何如玉薜榮一氣任開謝不惟詩旨
深書法亦稱霸奴視趙與董北海斯方駕學士公裔孫清
望擬嵩華亦以文學顯手澤寶籤架招邀皆巨公傳玩引
飛聲一從座後觀斂手起驚詫墨光聚花氣滿堂交激射
袖得餘香歸芬蘊平美清夜

送陳理堂學博歸江南

一肩行李一吟身旅食京華計苦辛草長鶯飛宜逕去石
泉槐火又重新從來易水難爲別除卻江南不算春下水
船中天上坐布帆安穩作歸人

閒坊冷曲共嬉遊漠漠風情似水柔二月濃春過病裏十
年往事滿心頭狂來每倚三分酒別去誰消一文愁拔腳
輾紅君竟得不辭典盡鷓鴣裘

聞道宣房未築宮下流春汎頗洶洶時揚州患水天心是要江
河合地勢愁當湖海衝莫漫停橈賦花月先教徙宅避魚
龍秋來更獻平渠策好共賢書達

九重

欲換頭銜愛冷宮如君無意得來難醉時欲碎珊瑚樹醒

後仍餐苜蓿盤但去莫嫌經舍窄就中差覺宦途寬江山
詩酒須行意好爲師儒一洗酸

送嵇立亭歸梁溪

只送人歸不自歸都門柳色故依依春寒未免欺駝褐野
性行當遂鹿菲去路江湖隨地闊到時櫻筍入筵肥爲君
更誦還山樂第二泉邊一浣衣

楊西禾來京話舊且出前年見贈之作和之

一片輓紅地羣公得得來時聞稚存亦將至鬚髯爭我富懷抱爲
君開刻意馴龍性含情守雉媒相期好風日並馬訪金臺
窮天作游記蓋代得才雄餘子空頭項斯人未聞蓬邸齋
今共兩湖舫昔分風竹馬論文地知君感舊同

苦雨

雨脚如絲苦未收涼深五月儘披裘一方坐對堂坳水萬
里心懸瓠子流底事孤螢明入夜最憐百草爛先秋三間
老屋渾防塌可笑先生不自謀

與稚存話舊

如後噉夜雁嗥晨剪燭聽君話苦辛縱使身榮誰其樂已
無親養不言貧少年場總刪吾輩獨行名終付此人待覓
它時養砂地不辭暫踏輓紅塵
身世無煩計屢更鷗波浩蕩省前盟君憂多故傷懷抱我
近中年惜友生向底處求千日酒讓它人飽五侯鯖顛狂
落拓休相笑各任天機遣世情

題楊鑑亭秋曹幽篁獨坐圖

水竹淮南賞區中靜者緣移來一片月寫以七條絃衣露
淨遙夜檻花敲斷烟因之媚幽獨清影共嬾娟

送韋書城南歸

夜燈分作江南夢看爾風塵竟拂衣湖上酒徒齊拍手一
天秋與故人歸

來歲

鑿興幸吳會期君獻賦排蒼旻可知車騎重歸客卽是家
徒四壁人

冬夜飲程魚門編修齋觀耶律文正公像

湛然居士心如水八葉東丹老孫子真人已起幹難河佐

命先推撒合里冠金花冠衣只孫丹青褒鄂森有神寶鑑
寒冰出顏色雲霾草昧思經綸西窮瀚海登崑崙角端人
語天回噴畱將不盡付天地身是閩山一片雲巍然遺集
見餘事一代文章占初氣誰知字字華嚴來真宰填胸偶
游戲萬松野老稱古歡墓門相望松楸寒昔時展墓今展
畫爲結一重文字緣翰林詩仙亦髯叟千載同堂酌杯酒
今髯何必非古髯落落寒空數星斗

歲暮懷人

打窗凍雨剪燈風擁鼻吟殘地火紅寥落故人誰得似曉
天星影暮天鴻

當時置驛起聲名老去傳經倍有情慙愧西游邴根矩東

家孤負鄭康成 鄭誠齋先生

小謫陳芳現在身 人間何事做精神 幔亭仙客休相待 八
百孤寒要此人 朱笥河先生

興來詞賦諧兼則 老去風情宦即家 建業臨安通一水 年
年來往為梅花 袁簡齋太史

采石磯頭太白樓 蛾眉博望捲簾秋 先生暇日時登嘯 為
我題詩在上頭 沈既堂太守

春明門外送征驂 別味經年似酒酣 昨夜梅花香到枕 夢
回天北望天南 溫步容舍人

漢南仙客出羣才 綺歲清遊不可陪 我在長安反西笑 有
人置酒上叢臺 安桂浦孝廉

半載還家路八千 珠江何日喚停船 天涯亭上如回首 可
信長安是日邊 馮魚山庶常

感舊青門涕未收 君才端不愧箕裘 屈居第二非無意 來
歲春風讓舉頭 邵元直孝廉 是秋 以第二人舉於鄉

河湟俠少常難治 關隴流民少定棲 料理巖疆抵鄉郡 故
人家世本關西 楊蓉裳明府

湖干花月冷鷗波 半載清遊不奈何 借問襄陽舊風俗 可
容載酒習池過 仇麗亭孝廉

絕憶君家草堂月 往來帆影動簾紋 知君五載杭州住 一
夢西湖一見君 左杏莊秀才

問訊樓頭孫子荆 早除婦服尙吞聲 而今可有三危使 碧

海青天萬古情

孫淵如秀才

丙歲孤篷泊京口聞君鄰舫倚歌聲銀箏紅燭三更話風

雪江湖十載情

閔季心都司

臺址何年賸可詩嶺名應不罷相思輕紅三百憑君擘莫

負閩孃十八時

何數峯上舍

鬪茶燒筍味同諳愛說詩僧是野蠶手種庭前雙桂樹一

天秋思古淮南

孫吟秋上舍

君之嶺嶠我燕游北雁南烏兩地愁可惜白雲尖上月兩

家樓閣十分秋

蔣良卿布衣

負笈輸君學是遊移家增我病兼愁仙山九曲經過處識

得迴腸似此不

陳菊人上舍

故家庭院水般清手撚花枝一笑成乍見還驚卻回顧不

恆風調大慙生

烏絲闌格鼠鬚描愛我新詩手自抄莫怪年來拋韻語此

生無分比文簫

臘月廿五日飲翁學士寶蘇齋題錢舜舉畫林和

靖小像用蘇韻

一枝梅折孤山麓冷浸銅瓶汲湖淥卽此便是逋仙魂變
現花前貌如玉此花只合先生詩便著言詮都絕俗玉潭
妙手爲寫真五百年來閱風燭石几生雲氣尙温吟眸點
漆神逾足一童一鶴猶依依詎是無情拋骨肉妻梅謾語
如可憑清供家山問誰錄後人但賞疏影詩誰知別有相

思曲堯山堂外紀載林惜別長相思詞注云林洪著家山清供云先人和靖云云卽其子也乃喪偶未娶爾
老去高情寄託深幾株畱伴墳前竹何當喚起圖中人茗
話寒宵淪甘菊

又用前韻題翁覃溪所摹和靖秋涼三君二札

放鶴空亭倚孤麓殘梅零落湖波淥寥寥遺墨在人閒不

共沈蕤一簪玉楊璉僧伽發公墓但玉簪一枝端硯一枚三君八郎知阿誰得

識此公皆不俗念友期聽烟寺鐘聯遊遲剪風船燭菱角

少許致不難寄錢二索愁未足札中尋常語妙書更道此

亦何羨西臺肉學士雙釣宛入神詩境停雲互收錄鬚眉

彷彿想見之歸臥夢繞西湖曲空山無人獨立久夜深似

有風敲竹乞摹萬本映窗光洗眼新泉浸寒菊

小除日經廠市見王叔明畫愛不克購歸以志懊

長安幾人愁歲逋誰耐齷齪看妻孥市中鴿炭白金換廟

上爆竹青紙糊紛紛景物百刺眼瞥見水墨江南圖尾鈐

猩脣叔明字心知其是焉可誣藏古篆法意慘淡備諸皴

妙曾鍾鑪青林杳冥翠竹暮更不著人聽鷓鴣一重一掩

自開合萬壑千巖知有無借問主人沾不沾氣所不足辭

囁嚅烟雲過眼沙脫手不知去落何人廚歸來嗒然欲忘

我急喚墨汁書門符

元日大雪疊前韻

昨宵連巷喧索逋我亦瑟縮羞妻孥朝來抹眵忽失笑一
天快雪雲模糊九重闔闔玉爲闕千門闔闔天開圖三元

節見三白端田公嚇嚇言豈誣蟣臣稱賀孰爲達亦感鼓
鑄隨鴻鑪端坑呵凍暈鸚鵡聞蓋試茶溫鷓鴣不令俗物
擾清供只除哦詩一事無亟謀歲飲傾市沽家人圍坐言
咕嚕閉門一任燒連寢隔舍或驚烟起廚果然一醉萬愁
失不用辟惡新桃符

初四日復雪余少雲以和詩來卽疊韻奉答

和詩火急如償逋竊笑不暇嗔癡孥燈殘漏盡雪屋白有
似不著窗紙糊豈其飢吟坐真癖亦省僵臥誠良圖牆頭
前雪望後雪聞古老語今非誣諺云牆頭一條
白前雪望後雪知君渾舍
有同賞楫袖焜火圍地鑪兩家北上逐鴻雁一心南飛隨
鷓鴣恢疏在骨合憔悴緩急叩門誰有無不如放溜下直

沽舟人醉語同話嚬了知浮世等蓬梗安用盛名爭顧廚
泥乾相訪出詩笑我歌定與君同符

憶西湖

舊遊最憶是西泠鏡裏雙高未改青見說穿雲開葛嶺不
殊洗石出南屏幾番金碧春邊換何處笙歌月下聽到死
不傳封禪稿斯人風節故亭亭

人日登黑窰廠歸集翁學士覃溪詩境齋

一放登高日始知塵海深天畱數峰雪雲閣半城陰苑樹
春還寂齋鐘暮已沈今宵有高會歸路遶寒岑
酒從詩境得韻比草堂清豔以三陽節分來七寶羹千秋
欣有託一飽詎忘情何必梅花發江湖思已盈

元夜獨坐偶成

年年今夕興飛騰似此淒清得未曾強作歡顏親漸覺偏
多醉語僕堪憎雲知放夜開千疊月爲愁心暈一層竊笑
微聞小兒女阿爺何事不看燈

圈虎行

都門歲首陳百技魚龍怪獸罕不備何物市上游手兒役
使山君作兒戲初昇虎圈來廣場傾城觀者如堵牆四圍
立柵牽虎出毛拳耳戢氣不揚先撩虎鬚虎猶帖以楛卓
地虎人立人呼虎吼聲如雷牙爪叢中奮身入虎口呀開
大如斗人轉從容探以手更脫頭顱抵虎口以頭飼虎虎
不受虎舌舐人如舐穀忽按虎脊叱使行虎便逡巡繞闌

走翻身踞地蹴凍塵渾身抖開花錦茵盤回舞勢學胡旋
去似張虎威實媚人少焉仰臥若佯死投之以肉霍然起
觀者一笑爭釀錢人既得錢虎搖尾仍驅入圈負以趨此
閒樂亦忘山居依人虎任人頤使伴虎人皆虎唾餘我觀
此狀氣消沮嗟爾班奴亦何苦不能決躡爾不智不能破
檻爾不武此曹一生衣食汝彼豈有力如中黃復似梁鴛
能喜怒汝得殘餐究奚補俚鬼羞顏亦更主舊山同伴倘
相逢笑爾行藏不如鼠

題翁覃溪所藏宋槧施注蘇詩原本

卽宋商邱所藏本後歸查

初

注蘇之難如注杜誰識良工最心苦永嘉本已芻狗陳商

邱刻擬景星觀終愁綴葺或失真遺辭浪說由儀補天吳
紫鳳一倒顛星宿崑崙孰洄湖廢書神遊嘉泰年潛司善
本落何所誰知好物如龍騰六合翱翔擇其主歸然靈光
歸寶蘇齋名初白菴中此先貯率更楷法久更新施顧同時
一機杼詩外有史史可增何必蟲魚鬪箋詁絕識博學兼
歷年能事無慙劔南序更從缺簡追混茫益歎今傳多錯
迂古人所有不盡有補之以臆毋乃魯查田謾說能訂譌
但存其舊不猶愈功臣玉局自有真益友吳興究奚取興
來竟欲家置編化千萬億光氣吐不令此籍遭泥蟠一爲
詩生洗腸腐公如有意付木工乞附姓氏公其許

花朝程魚門招飲分賦蘭得花字

光風轉綺席雜卉明繁葩中有空谷姿欲花猶未花移來
白唐窈廟市分其芽植根賴淺土障塵施薄紗試問山中
時有此風味耶幸入善人室不殊幽士家依依壁閒影灑
灑杯中霞孤賞欣所託遠思靡有涯陶然盡餘酌歸袖花
風斜

趙渭川至卽題其紀游詩卷

三年詩破笑萬里客排門衣卸雲千嶂譚傾海一尊疊成
新鳳曲招得古梅魂昨夜思君夢羅浮掛月村

桂未谷明經以舊藏山谷詩孫銅印見贈

我友曲阜冬卉子六書摹印眞吾帥鑄金同用范沙法顛
倒斯籀同兒嬉柳閒鍛竈每相過篋中字書隨所攜脫囊

贈我一銅印精絕審是潑蠟爲朱文字減土數一彷彿西
江派中人所遺不然卽是吾家子畊紹谷輩云山谷孫系
以詩鸞翔蚪結一入手我欲拜賜心然疑我祖詩可祖天
下凡能詩者宜當之若資華胄便竊據不患造物嗔吾私
雖然一語敢相質斯道不絕危彙棋文章千古一元氣支
分派別徒費詞幾人眼光認鍼芥學者蟻附緣條枝雄深
一變爲飢餓精華已竭存糟醕康莊不由入鼠穴細尋牛
毛披繭絲強將譜系溷初祖九原可作夫誰欺摩圍派衍
源屢竭皖公雲封人莫窺我生衰門更才劣豈有筆力能
振支但將此印印家集一編世守儕尊彝北平學士覃今
巨手後先心印無差池李洪之編任史注薰蕕灌露窮搜

披掃除荆莽出先餒我翁斯文今在茲不信請將我言質
報贈愧匪瓊琚辭

送邵元直南旋

五年心跡感雲泥再世交情惡別離聚散不妨成小劫分
沈無計可爾知只宜東野聞猿慣誰笑歐陽賦燕癡寥落
酒旗歌板不堪君去我遊時

未谷以漢瓦并天下文揚本屬題

一篝火起狐鳴野三月阿房土花赭卻畱餘燼在關中燒
出未央宮上瓦其時天下方匆匆銅鞮之北平城東歸來
金碧一照眼雙闕屹峙天當中按劍一怒隆準公鄴侯數
語天回容此曹相從布衣起望氣久已知雲龍宮成何必

天下定以耀萬世威無窮此瓦團圞不盈尺四字篆文隨
瓦合多少中原逐鹿人若見此文同一泣蒼然古製踰香
姜何論急就兼凡將會共朝霞映金甌不隨夜雨飄鴛鴦
豈無萬壽長生字看來無此英雄氣離宮百四空斜陽殘
本淒涼出都肆知君好古一世無摩挲舊搨意有餘更披
三輔黃圖錄補入西清古鑒圖

兩當軒集卷第十四

兩當軒集卷第十五

武進黃景仁著

古近體詩五十一首

言懷和黍維

不與黃金不與閒我曹無計破天慳半生骨相慙分茅五
載鄉心只放鷗好景漸消頭上月片雲常護夢中山可知
來日愁無益且讀離騷書掩關

移家南旋是日報罷

朝來送母上河梁榜底驚傳一字康咫尺身家分去住霎
時心跡判行藏豈宜便絕風雲路但悔不爲田舍郎最是
難酬親苦節欲箋幽恨叩蒼蒼

直沽舟次寄懷都下諸友人

幾年橐筆走神京，賸有扁舟載月明。
掉首已拌遊萬里，懷人猶是坐三更。
座中許郭勞聲價，市上荆高識姓名。
消得向來塵土夢，被他柔櫓一聲聲。
讀書擊劍兩無成，辭賦中年誤馬卿。
欲入山愁無石髓，便歸舟已後萼羹。
請成野性文焉用，淡到名心氣始平。
長謝一沽丁字水，送人猶有故人情。

舟過楊柳青感舊

此地尙餘楊柳青，昔年獻賦記曾經。
龍舟鳳帽雲中見，廣樂鈞天上聽篋。
裏宮袍猶白，豔夢中綵筆竟無靈。
阻風中酒情何限，目斷孤鴻下晚汀。

滄州晚泊

清風樓下喚停船，頓袖篷窗思惘然。
不見中條徵隱士，空懷東海挾飛仙。
人同聽雨誰千古，天放看山又十年。
滄酒一尊聊自醉，烟波前路正無邊。

吳橋

一川百折似蛇枉，越舸吳艚日來往。
輕帆片片白雲飛，小市嘈嘈語聲響。
正是鄉心暮更朝，客程無那說吳橋。
非無繫棹雙楓樹，亦有當窗萬柳條。
風景雖然似吾土，只共平頭作鄉語。
一種懷人去國情，可堪愁水愁風苦。
沙鷺驚人撲淥飛，濺來涼雪滿征衣。
少年江海貪爲客，何日風塵竟息機。
眼看鄰舟掛帆去，未識今宵泊何處。

德州懷汪劔潭

三兩初明野戍口鼓聲催權向津亭漸驚齊語烟中出尙
怯燕歌夢裏聽岸柳漸消愁鬢綠市燈猶照故衫青前游
記有汪倫在歲暮相依作客星

董子讀書臺

廣川紹絕學命世伊呂儔對策未竟用說災行見收遂令
王佐才老逐經生游東海牧羊叟乃是平洋侯方以曲學
顯亦曰治春秋再遣相驕王不異豺虎投爲問東閣門磬
折何所求一上丞相書未免經術羞幸哉盛名下猶得遂
首邱差勝洛陽賈作賦沈湘流經過下帷處高臺列松楸
感激土不遇此意良悠悠

平原

風塵想像出羣才公子平原似掌開馬磨牛醫天下士買
絲今日繡誰來
三千靜塞擁登壇失計平原棄郡還河北淮西同一死白
頭泉路愧常山

禹城

禹跡茫茫代幾更古堤崩剝勢如城九河故道都磨滅何
似人心總不平

耿渡

朝發齊河驛乃道耿濟渡飛梁破長烟斷岸積陰霧萬弩
奔流攢如挾鼓聲怒當年耿伯昭懸軍此飛度一鼓拔祝

阿轉戰得張步掃平三百城主道開東路以比韓淮陰文
叔言非誤落落難合人功名在遭遇風雲鬱沈薶川陸莽
回互懷古心悠然停車一延伫

歷城道中

北游忽不樂東來攬齊岱陸盡燕趙交水送汝泗會只有
清濟源伏流隱支派亦如古達人心跡有時晦羣山盡朝
岳敢向不敢背峩峩靈威丈指我青霞外返客遣片雲飛
來若車蓋揮手暫相謝冰霜迫徂歲遊倦思小休勝濟行
未艾寄語雪中花石上勞相待

望匡山

白也書堂在雲林似昔時星辰如可接猿鶴尙餘悲去作

青山塚歸虛白首期憐才意千古高咏少陵詩

十四夜宴程澂江學使者座

僕夫勞夢破昔昔酒醖歌圓忽今夕亥爲屠肆鼓刀人甫
也諸侯老賓客少年去我何堂堂對酒當歌吁可惜若論
當時意氣場奉誠子弟皆頭白西京絕技擅郭張南院新
譜翻康王千金共說鹽爲笑一曲能回木作腸但使人生
皆此夜不知何處是它鄉筵前按曲誰前輩無復何戲故
人在又是當場一輩人參軍蒼鶻紛成隊君不見鄒生一
徽悲楚懷公子亦爲雍門哀此閒行樂豈歎所且開笑口
呼杯來答刺稜登一聲歇樓前惟有茫茫月

謝程石綠餽梨

結友須快友食果須快果分君口頭甜沃我心上火經秋
況病肺蒸食無不可元關溢華膏舌本粲蓮朵承囊出漢
殿包箬飛吳舸何如秋白佳冰雪夏碎瑣腴奪金蠟九脆
壓齏蚪顆雅不羨回甘甘回舌先鎖徒然負盛名其實則
么麼此語勿告人或者唾罵我飽嚼聽松風何似在塵堞

泉上

濟出地爲澗百竅飛名泉初疑地脉碎誰識天機全蕩搖
烟靄珠碧暈激漱風石箏琵琶舜田仙杖倒晴翠映帶密
樾交漪漣千頭魚戲影載載一足鷺立姿翩翩宛然發興
在濠上卻笑莊惠多言詮世上小兒強解事分次甲乙爭
喧闐誰知清濟一而已泉自不語流涓涓長瓶大甕日來

汲幾輩飲水知其源我家仕近二泉側愛聽蚓竅松風前
區區較此但百一便擬買宅居窮年手攜桑苧經一卷日
日來放鱗魚船

華不注

卓地青蓮忽千仞虎牙森立羊腸紆更無山附始知峻尙
許客登何患孤壯士三周解鞶戰謫仙一去荒齊都試從
絕頂俯下界便是匹練叢花圖

題會約菴雨中海棠

紫棉初綻錦繽紛曉靄廉纖浴絳雲帶溼尙堪春一國暈
潮猶長去酒三分輕陰乍許飛章乞沒骨從教着露勻省
識扶紅意辛苦好將顏色報東君

使院堂陰奇石昔人題之曰石芝

當階忽雲根現出九華小
纒如翔鳳鸞不敢下凡鳥
松胎孕星星岳色浮了了
一穴通仇池三峯接蓬島
何人題石芝積蘚勤剔掃
尋名轉愕眙欲摘屢傷爪
朱柯肖輪囷華蓋狀糾矯
紫翠撲人來靈光燭霞表
豈惟倒海岳或恐下商皓
頗笑玉局翁夢境殊艸艸
何如此庭中一日百吟繞
倘有煮石方那患熟芝老
急喚金鴉鋤吾方待之飽

鮑叔祠

誰道人心不可淳此公祠廟至今新
能知有母真良友若解分財已古人
倦客飽看翻覆手短歌聊當送迎神
略嫌慷慨龍門筆倘有恩仇氣未馴

濟南病中雜詩

于世一無用向人何所求
匿名屠販下伏枕海山秋
遠水通鷗思長雲落雁愁
微軀等蓬累隨處足勾留
肺病秋翻劇心忡夜未寧
聰明消患苦書劒易參苓
此子久傷氣何方解鑄形
輔車猶可識決日向繁星
車吹噎都會幽居此靜便
支牀無醜石繞砌得名泉
地冷荒秋夢林空淨夜禪
短檠常照我蕭颯竟中年
志怪心猶喜談經氣已平
遙尋海上客長謝魯諸生
識字真多累爲儒例合輕
未應伏阜馬猶作夜深鳴
夢北醫難覓圖南計總噴
浪游人海去空入寶山迴
劉蛻文成塚君苗硯已灰
中庭撫枯樹太息此琴材

李杜清游在風流杳莫希斯人如未死吾道詎應非北渚
沈寒潦南山冷翠微空餘昔時月永夜滿征衣
小住猶爲客吾生亦已勞補窗驅野馬洗壁畫離騷澹日
寒逾瘦孤雲懶不高何因挾枚叟同話廣陵濤

偕石緣遊歷下亭

城外青山城裏湖七橋風月一亭孤秋雲拂鏡荒蒲芡水
氣銷烟冷畫圖邕甫名游誰可繼頴杭勝蹟未全輸酒船
只傍鷗邊艤攜被重來興有無

庭下有泉卽珍珠泉入明湖之過脉也

跳珠濺雪碧玲瓏甃石迴欄录曲紅忽現滄溟池沼內欲
迴天地桔槔中明河影向三霄接清灤源知一脉通咫尺

名湖輸不盡可知有本是無窮

雪中飲四照樓卽席呈程端立學政

彤陰閣簷雀啄枝客懷鬱邑無由奇樓頭快意忽此酒飽
看玉戲天公爲入窗洞開萬井寂羽原灰野浮參差舜田
忽攝雲外去鵲華兩朵相蔽虧公然奪我四山翠但與清
氣通絲絲明湖百頃不可辨隱約凍澈青琉璃更無纖芥
礙眉睫時有冷光浮閃屍仙乎此樂不可極狂來欲叱銀
龍騎不登此樓凡幾日儻忽變態誰能知梁園數子各兩
散聚星堂客皆雲馳悄然念舊不成醉主人款款浮深卮
因思此樓初建時一時觴詠推南施我公文彩迴相映山
左復見河汾師

薛文清視學山東諸生稱爲河汾師

玉寒冰瑩山氣象鹿巾

鶴警仙丰姿愛攜賓從宴清暇不廢榦樸借追陪斯遊直
可韻千古暖寒會上真兒嬉明朝定發郢中唱敢以寸鐵
當雄師

得吳竹橋書趣北行畱別程端立

乞食江湖客傭書館閣身行藏聊自點歌哭向誰真未捧
毛生檄難辭庾亮塵此行吾豈意可奈尺書頻
暫作平原客頻傾北海樽半甑分謝朓一榻下陳蕃迹
才齊右衝寒又薊門將心託鴻爪到處一畱痕

別岱

岱爲五鎮首禮秩崇三公是有軒冕氣不與尋常同所愧
賤士醜欲往知無從遷延一彈指便絕風雲蹤咫尺成迴
車有累寧非窮空吟望嶽詩遙憐杜陵翁天門展映蕩古
與人境通我自不能到缺望將毋惹回首仙臺雲去路爲
我封未死尙可復多言神吾恫

望鵲山

籃輦出郭二十里向客一峯如鵲起傳聞中有扁鵲祠草
木至今猶未死禁方一卷世不存地上多是強死人祖洲
大藥不可得令人長憶長桑君

河堤

客行迫歲晚憂端耿非一鐸聲破殘夢塞幃忽如失道經
古河堤奔駭勢難述人從釜底行車自日中出崩崖如雲
頽斷岸擬劍刺衝嚙餘沙痕詭醜狀怪物試問馮夷神何

年徙其宅故道已荒芒形勢猶彷彿想當疏鑿時羣靈受
撫叱陵谷身後事古聖不能必至今地不耕磽确石其質
徒然怖行旅往往遭顛躓懷古心方長出險走逾疾回首
浮雲陰蕭蕭下西日

渡運河

喚渡高城下斜陽澹一川舊遊仍北上親舍已南遷雁笑
衝寒客雲迷望遠天離波逐思淚流得到門前

車中雜詩

天寒行旅稀語聞浣花老我見殊不然勞人多草草前車
接後車魚貫爭古道行色或輝煌形容半枯槁是各有室
家亦豈無翁媪置酒亦足娛塞瑾詎不早而必衝寒行風

霰犯昏曉我亦廁其閒軀此一粟渺何意號寒蟲轉作流
離鳥一貧能驅人環顧憂心悄

十室或爲堡三家亦成村賽社鬧鵝鴨趁虛喧蝨蚊此鄉
今年豐民樂氣自淳何乃塗路閒雁戶紛成羣扶攜雜老
穉負擔兼瓶盆奔號乞一錢遮攀礙雙輪人飽爾獨飢歲
富爾亦貧或爾愛游手不肯爲石民叩之旁人言乃異吾
所云此曹農事畢耕作待發春乞食非本意聊以度蕭辰
聞言爲失笑可喜不足嗔我錢苦易盡爾術亦已新謀生
固多道各荷皇天仁

除夕述懷

我本江海客風水性所諧爭食雁鷺侶眠飯蛟龍潭吳山

及越水到處工幽探強來北地遊埃壒積不堪傭書讀中
秘逐隊趨趨煙海迷津涯十不憶二三欲投祭酒筆骨
相慙燕頤平慈親迫榆景髮脫難勝簪迎養薪桂地所愧
缺旨甘斜街路南頭因樹三閒庵老人弄孫罷繡佛依香
龕昨來秋風起語我思江南片舸下澤潞家具不滿擔拜
送心斷絕而我羈歸驂有兒名一生廢學增癡慈曾不識
之無但索梨與柑有女已上頭長欲與母參心性稍姑慧
恨渠不爲男俯仰既無藉出處彌自慚薄遊向齊岱聊寫
憂心悞一看封中雲快聽海上談懸車待春發陟岳搜穹
嶼日觀倪滄海天門豁層嵐捫碑倚石表發策開玉函誰
知靈威丈赫爾噴其貪仍復驅我來臥病同僵蠶努力近

藥物割嗜疏酒甌三豎雜虛耗環伺何眈眈昔年壯意氣
萬象供嘲哈今如病馬伏不任驅驂驪面用方麩障口擬
石闕含亦有舊攜劒鏃澀昏星鐔亦有幼讀書塵封鮑魚
蟬一僕窮相隨膚癩鬢毳作字遣之賣易菜日半籃縮
頸向爐火暖意偷春酣忽訝歲云盡淚下衿衫滄轉憶去
年夕渾舍談詰誦索速雖填門相對樂亦湛今反作孤客
枯寂同瞿曇百感自然集苦吟詎所耽顧影坐分歲漸聽
晨鐘韻

題余少雲蕭寺吟秋圖

去年九月我別君城南古寺夜打門酒寒燈瘦話徹昔秋
聲但覺不可聞今年指我街西館脫手新圖水初剪樹樹

西風葉葉秋迸作商聲落吟卷我攜襪被來結鄰蕭然二月無好春花無一枝樹無葉豈獨秋風能惱人滿灑雙九此愁送壞塔殘碑日摩弄優鉢香中共佛燈摩尼燄上分僧供百年聚散只須臾此景他年不可摹更回蕭寺吟秋筆爲作蒲團看劍圖時方屬作此圖

題明人畫蕉陰宮女卽次徐文長題詩韻

記調絃索侍深宮手種芭蕉綠幾叢行過蕉陰卻回顧美人心事怕秋風

偕伯扶少雲遊崇效寺卽贈寧上人

唐建舊名
粟花寺

春雲開積陰三五挈遊袂病餘散腰腳討春得春意遠松車蓋形徑造松下寺寺古無丹青地僻馳車騎棗花錫唐

名田盤印初記畱詠多前賢展卷墨香醉頗怪竹垞翁舊聞闕編次老僧喜客過高談足清思支郎旣該覽惠公亦張識千花緡大乘五家闡精義獨於南頓宗別樹一旗幟孰云成象龍而必離文字夕陽轉空廊竹柏影滿地欲別掩勝賞彌畱愧塵累送客齋馨涼泠然出空翠

題洪穉存機聲燈影圖

君家雲溪南我家雲溪北喚渡時過從兩小便相識白楊頭望何安居辛夷樹訪迂辛宅君言弱歲遭孤露卻伴孀親外家住塵封蛛網三間樓阿母悽涼課兒處讀勤母顏喜讀倦母心悲不惜寒機杼千帀易得夜燈膏一瓶燈滅尙可挑機斷不可續樓風刮燈燈一粟書聲機聲互相逐

屋角時聞鄰姬愁烟中每撼林鳥宿老漁隔溪住十年君
家舊事渠能言打魚夜夜五更起蔣家樓上燈猶然卽今
此景空追溯蓼莪已廢白華補寫聲寫影工則能難貌孤
兒此心苦如君獨行世無匹謂我知君一言乞君名已達
薦賢書毋傳應歸赤心筆我慚腕弱何能任忽復思淚沾
盈衿畫中咫尺逼親舍南望白雲千里深未能一笑酬苦
節空此春暉寸草心剪燭題詩意無已急付橫圖捲秋水

放鶴圖黎二樵爲周肅齋明府作屬題

二樵筆如鐵裏綿愛畫獨柳秋灘邊枝枝葉葉帶風色坐
令山水生清妍一琴一鶴一童子使君宦況清如此呼童
放鶴拏舟行淡淡斜陽天拍水其人與畫皆千秋令我悄

然思舊遊梅花夜舫孤山寺芳草春江鄂渚樓

題李明府天英借笠看山圖

江萬山間雨勢挾舟入中有看山人坐借長年笠錦石
丹崖望不分沙迴樹靡追何及十年夢與桐君期羊裘釣
客空所思七里濤分灘上下雙臺雲隔路東西此閒我亦
推篷慣恨不相逢借笠時是物等閒難得戴著屐何如放
船快君與東坡兩蜀人披圖似有英靈會祇今插腳輭紅
塵清景都從畫裏親年年穩坐滄江雨畢竟輸它笠主人

惱花篇時寓法源寺

寺南不合花幾樹鬧春冠蓋屯如蜂遽令禪窟變塵街曉
鐘未打車隆隆我時養疴儻僧舍避地便擬東牆東花開

十日不曾看鍵關不與花氣通漸驚剝啄多過客始覺門
外春光濃數弓地窄苦揖讓一面交淺勞過從翻書奪席
苦拉邏應門煮茗煩奴僮因花致客真被惱求寂得喧毋
乃窮斫花徑擬借蕭斧深根鏟斷繁英空不然飛章乞猛
兩使李褪白桃銷紅不憂人譏煞風景焚琴煮鶴寧從同
花如顧我啞然笑雜以諧諛通微風爾今窮瘁實天子豈
有生氣回春容無人之境詎可得徒使冰炭交心胸非人
誰與聖所訓有怒不遷德則崇去留蹤跡孰相強曷不掉
臂空山中同生覆載各有志我自開落隨春工客來客往
豈有意而以罪我徒徧衷對花嗒然坐自失何見不廣儕
愚蠢明當邀客坐花下爲花作主傾深鍾焚香九頓法王

座祝客常滿花常穠

馮魚山張粲夫洪穉存安桂甫余少雲同集寓齋
爲餞花之飲得餞字

今朝百事從屏遣一飲無名借花餞春藏佛地晚更濃客
惜芳時會頻展入杯一片意已醺鋪徑重茵坐隨選繡旛
微裊星辰閒錦幕不張蜂蝶善高談欲下曼陀羅結習詎
了摩訶衍我今示疾倏衰嫗公等逢歡宜勸勉明當闔闔
謝羊欣門外香泥愁踏踐

送邵元直歸里卽題其享帚樓

人去兼春去今年似舊年半酣休斫地一第比登天世業
書充棟歸裝月滿船連牀十年事話到燭花偏

憶昔君家訪高樓琴水陽簷飛山雨翠簾捲海雲黃百尺
歸堪臥千金願易償贈行聊壯語傳世有文章

兩當軒集卷第十五

兩當軒集卷第十六

武進黃景仁著

古近體詩三十首

出都過蘆溝橋

九堦車馬暮駸駸幾曲渾河落日陰來似閒雲去流水此
橋原不變人心

張桓侯故里

小店猶名義居民半姓張時時有雲氣往往接樓桑古井
輾轆咽叢祠枯柏蒼英姿見矛馬無命亦堂堂

安肅道中

小邑如村落飛花送客鞍菜租田上價柳禁路當官古調

憐車鐸鄉心負釣竿
郎山青未了誰與盡情看

荆軻故里

一擲全燕失悲哉壯士行盜名原不諱
劔術本難精市筑憐同伴沙椎付後生
魂兮歸故里易水尙風聲

曉發保定

殘月未沈山啼鴉初起樹已有馱鈴聲
郎當過門去馬嘶人起何恩恩高城鼓角猶隱空
塵寒幾盞蘆蕪酒吹夢兩行楊柳風自過涿郡辭燕地
路指神京哄車騎大道青樓望鬱葱
碧波錦樹交空翠蒼莽初無冀北風
冥濛卻有江南意江南行客行未休
碌碌趁人何所求暫時快眺亦神王何必車前有八騶
車聲歌聲相閒作今日方知曉行樂

堯母廟

百里見堯山刺空出青峭行觴第一泉
得謁堯母廟制擬茅茨餘器惟蛇土
肖丹陵緬鬱盤黃雲想焜耀伊耆雖載遷
慶都不殊號都山望堯山離立若壺嶠
母望子曰慈子望母曰孝至今兩山閒
雲氣相繚繞棖觸遊子心蒼茫獨憑弔

定州道中

垂鞭信馬未知還古國鮮虞指顧閒
北去雲埋秦上谷西行路出漢中山
草無斷綠難分樹山不停青直到關
待覓壚頭千日酒月明沈醉唱雙鬢

真定道中

風色大旗上雲開見堞樓亂山來北岳遠樹出并州客意
欣槐午農情慰麥秋滹沱仍喚渡驅馬思悠悠

獲鹿

入陘程第一過嶺險多般笠影斜懸日鞭梢響徹山鹿泉
流泱漭石邑路閒關更訪淮陰廟殘碑拂蘚斑

龍窩寺

眾山如奔湍忽復作渦旋疾激得盛怒盤回若餘眷其所
縈結處意象百鍾鍊哈呀狀崩城缺巒肖斷堰陰崖慘鐵
積陽岫條霞絢梵宇蜂房懸僧寮蟻珠穿雨溜壁壓簷風
動石當面愕眙森動搖獨立訝變眩名山界衝衢淨域等
郵傳火地青蓮開窮海寶山現鐘聲不破迷茗飲聊紓倦

去去那復畱身如脫弦箭

核桃園夜起

夢回小驛一燈紅四面醒吹草木風身似亂山窮塞長月
明揮淚角聲中

井陘行

東風吹車入土門井天一線愁霾屯俯驅鼠穴仰蚰竇千
巖萬壑相吐吞重關虎踞三十六參井歷歷手可捫我生
不識秦關蜀棧之險絕對此已欲墮淚銷驚魂東襟莽幽
冀西距雄并汾中間一束作天險古來戰鬪何紛紛我所
思兮韓王孫悲莫悲兮安成君一言不聽左車計舉趙一
擲殲其軍空餘恨血泚水上千秋嗚咽流渾渾至今羣山

猶作背水勢深林巨嶂似有赤幟屯如雲嗚呼王孫兮王
孫爾能被趙方朝殮井陘之險爾可談笑入一婦人手繫
爾同騶躡世途夷險那可道功名成敗安足論蒼茫落日
滿山谷終古誰怨誰爲恩離禽駭獸自來往懸崖激澗磨
朝昏卻畱遺蹟慘行旅十步九息愁崩奔清時地險亦徒
設盍借巨鐵劖雲根今省何處息勞夢半嶺上有三家村

固關

天與雄關鎖晉陽巖城岿接邊牆水兼絲蔓渾流合山
接黃榆惡嶺長關吏頻年愁歲課戍兵終日臥雲光前途
更在鳥飛外何似驅車度太行

舊關道中

峯尖木杪趁行輶悽苦樵歌逐澗流漸入山深猶趙地直
從天上望并州將軍壘畔開雲散娘子關南暮雨愁悵眺
不知身在險前旌已下亂岡頭

女媧廟

繼王雲爲姓神媧女是皇職婚勸太昊正系紀承匡在昔
金行慘因之水勢張滔滔翻地軸洶洶墮天綱柱訶不周
折都愁中冀荒惟靈驅颯爽悉力靖披猖異族投窮野中
皇兆發祥蛇身蟠上下鼇足奠蒼黃煉石言非誕屠龍說
詎盲捫虛填氣核鑿空逗天光蹟闕爭開闢功高接混茫
空山餘插竈破廟枕平岡像設丹青古春秋祭賽忙東西
兩浮化煙靄自蒼蒼

青玉峽

急峽東山轉危崖蔽日長片雲迷出處羣玉儼鋪張石很
羅人鮮泉清涌帝漿孤猿一悲嘯過客盡沾裳

柏井驛

石砦荒涼古路封回頭林翠合千重煙銷始見峯圍驛風
定方知寺有鐘亂石似羊空臥草片雲如鶴不棲松恩恩
小憩仍催發雀躍狂遊意漸慵

平定州

驅車下嶺豁雙眸木末遙明鼓角樓不少亂山圍遠障卻
開平野受雄州雲流桃水千灘雪風動榆關五月秋好去
憑虛倚高閣回看城郭也銷憂

曉發芹泉驛

鴉兒峪水繞山回纖月疏林曙色催誰與高堂寄消息此
身已度井陘來

壽陽

馬首遺封在羊頭古寨平雲深一邑冷俗云冷壽陽地僻眾泉

清惟壽陽水獨清石角分成路山腰束入城韓碑何處訪炤悵不

勝情

暮投要羅寨登西嶺

上嶺復下嶺出關復入關但愁繭足萬山裏未得迴眺層
峯巔茲山峯完陡雲上俯視羣嵐盡孫行夕陽明滅紫翠
開茫茫欲逐天風颺北連恆岳南太行三晉河山屹西障

回頭卻望中山東已隨一氣浮空濛直從飛鳥不度處而
我掉鞅過其中有如航海得洲陽轉眄颶風鱷浪心忡忡
平時看山陋西北絕少幽靈但雄特今逢此景知昔非欲
賦登高愧無力嗟余羸病困緇塵暫得壯觀情許親肯爲
山多怯行路行看終南華山去

榆次道中

大道入雲平高槐夾道生出山驚馬瘦行野覺身輕俗重
野妨賽風餘蟋蟀廢迢迢晉陽路汾水向人橫

晉祠

懸甕之山晉水出漾石穿沙氣蕭瑟地古時生喬木煙雲
開或漏蒼崖日成王介弟唐叔封冢冢象設瞻闕宮千秋

遺澤雙流玉雨晉名藩一葉桐神堯開國乃其後怪事亦
傳文在手義旗電捲入長安曾禱祠堂得神佑太宗手書
貞觀碑紀年至自征高麗鏃金夏玉頌功德意氣絕似歌
風時金輿羽帳今何在惟有此泉常不改千畦流潤活并
州百道飛煙入汾水壅渠智伯貪天功趙家乃用平河東
誰知清絕濫觴處廢興不到空山中飛梁雜樹交縈互風
景還如道元注心空祇覓閒鷗盟坐久能知白魚數女郎
祠廟何年開反使正祀荒塵埃若論世久數宜簡古廟何
以存臺駘紛紛世俗誰可告乍許追歡莫憑弔爛醉于觴
且未休不然卻恐青蓮笑

夜宿朝陽閣感懷龔梓樹

叔虞祠下垂楊滿空翠堆中咽絲管夕陽人散廟門關惟
有鳥聲啼宛轉回首閒雲步山谷一燈自上西巖宿推窗
百里望川原晝靄冥濛辨汾曲嶺頭月落星光昏風景可
憐思故人空山唳鶴掠簷過彷彿似挾平生魂當日思君
此游冶白袷春衫制都雒一剪眸橫山翠開數聲歌過泉
流瀉題句空畱碧玉欄舊游不見青驄馬我後君來已十
年我來君已歸重泉水聲似咽鄰家笛雲影疑分夢裏箋
人去人來空歎息待人惟有青山色畱語青山問來客不
知我去誰相憶

徐溝蔡明府予嘉齋頭聞燕歌有感

并州作客意如何石調重聞掩淚多回首燕山五年住一

聲如聽故鄉歌

將之關中畱別吳二春田

百日飲無事酒五年讀中祕書文章浪解雌霓霓身世依然
蹇驢遮扇塵辭庾亮拂衣賦怕劉輿此時西廡剪燭何日
東墜負鋤

臨汾置酒爲別別意與之淺深畏人客子在昔行路難歌
自今河流千里一折山背十日九陰重逢早向京國莫似
周南滯淫

和畢中丞悼亡詩

三天都處卽清都薄謫靈華縞袂姝第一名仙才伉儷八
千里宦其馳驅淡裝恰倚芙蓉鏡香供頻圍翡翠鑪二十

年來成小劫碧城歸去不同途

我讀中丞感逝篇情文真覺後空前禹疏不到相離水媿
補難平有恨天花步卜居成昨約松門誓墓待他年遙知
聽漏黃扉日應撫衣熏一泫然

元夜大雪飲石香齋

天公不放燈價高故作玉戲酣今宵太乙醉眠藜火熄卻
化霏霏照書客買書策蹇過大航興來闌入元子坊擬金
伐鼓客滿堂主人壓醅喚客嘗開簾看雪雪如席燭光映
作輕綃色此是仙人潤骨丹傾入深樽壽千百不須更唱
月分光我自能歌冷飛白火樹拉折銀花開夜蛾拍空誰
剪裁天然點綴此佳節卻與我輩開羈懷藏驅奪席爭掀

脛雕盤綺食如山堆堦前盈尺雪不到酒氣溢戶寒光迴
飲一杯歌一曲一杯爲我醉滕六爾能迴驕驄驅寶轂六
街無塵九門肅不能使石香齋頭燈不紅酒不綠客飲不
豪歌不續但願歲歲如今宵便不看燈樂亦足不然九州
大地豐五穀來歲燈如太倉粟

兩當軒集卷第十六

兩當軒集卷第十七

武進黃景仁著

詩餘七十四首

減蘭 夜泊采石

一肩行李依舊租船來詠史四顧無人君憶元暉我憶君

江山如此博得青蓮心肯死懷古悠然雁叫蘆花水拍

天

憶餘杭 夜起

錄曲紅欄欹斷沼潑刺遊鱗窺夢悄披衣四聽闌無聲長
夜可憐清 愁中心似闌中月一片模糊難擺脫冷風吹
月入雲端連月不教看

大有 秋夜有懷次洪稚存韻

破帽尖風逗窗斜月耐十分秋枕寒悄數征期重陽節候
將到夜長自擁蘆花被共四壁冷蛩都覺幾處水上樓臺
一天雁聲籠罩 狂蹤跡空自笑洛水任漂流土人爭道
來往江潭回首驚魂堪弔聞說故園霜菊疏籬畔數枝斜
靠還憶煞歲歲花前箇人清妙

醜奴兒慢 春日

日日登樓換一番春色者似捲如流春日誰道遲遲一
片野風吹草草背白烟飛頽牆左側小桃放了沒箇人知
辨桐花下分明認得三五年時是何人挑將竹淚黏上
空枝請試低頭影兒憔悴浸春池此閒深處是伊歸路莫

學相思

負也樂

一匹馬千金買邯鄲少年有聲價唱龍沙拍胡笳吾曹健
兒不聽箏琵琶 漢家邊釁今朝始去去同生復同死天
蒼蒼野茫茫一片秦時明月掛邊牆

虞美人 閨中初春

繡罷頻呵拈線手昨夜交完九問春何處最多些只在淺
斟低唱那人家 半枝嫩柳當窗放偷得新眉樣晚霞一
抹影池塘那有者般顏色作衣裳

綺羅香 金陵懷古

何處獅兒半空飛下橫惹江東多事霜驟金戈開出千年

佳麗渡永嘉雜沓名流實鍾阜綿延王氣到如今一半興
亡南飛烏鵲尚能記 莫問臨春結綺其澄心百尺一樣
南內回首新亭消得幾行清淚歎曲裏錦樣家山禁幾回
北兵飛至只添他來往詞人多少滄桑意

臨江仙

中秋夜秦淮水榭

三載紅橋舊路輕塵暗換年華依然燈火照香車玉簫吹
子夜明月在誰家 前度青衫淚溼重來破帽簷斜帶人
風景又天涯垂楊空繫馬流水有歸鴉

貂裘換酒

秋蟬

聒耳真無賴到風前一聲知了樹閒秋在漸似詩人才盡
日尙作悠揚寒籟只此後青林難賣疏柳幾行臨水驛把

吟軀聽瘦斜陽外巴山磬清相賽 魂銷齊女芳華退更
增他淒涼宮鬢愁紅慘黛痾瘦林中休作惡風露餘生堪
貸珍重吸枝頭沆瀣畢竟侍中冠上物任孤高難把深秋
耐仙蛻去好相待

前調

秋雁

蕭蕭穿雲縫是無情一天冷雁將秋來送白草黃榆經不
盡帶得商飈瀕洞早吹度秦川朔隴幾處高樓聞太息把
邊聲攙入砧聲空好防卻金丸中 洞庭木落微波動記
清宵蘆花明月依依曾共偏向霜前悲故國叫得楚天如
夢渾似聽伊涼數弄聲漸不聞天更遠更衡陽萬里須珍
重回首處離雲凍

滿江紅 感舊

酒渴香消夢汝在意錢庭院依舊是春潮生頰露桃如面
病後腰成花一捻別來淚繳珠千串訴侯門多少苦和辛
紅妝賤 鸞掩鏡蟬分鈿南去鵲西飛雁嘆崔郊戎昱千
秋空羨二月竹枝辭峽恨三更柘舞臨湘怨夢回時斜月
滿關山無人見

昭君怨 初夏

一自護花消瘦病過折綿時候春去已天邊又今年 擁
住薄衾如水守得篆灰心死簾動有誰來是風開

拋毬樂 元日病中作

驀然沈睡驚醒一歲今又聽紛紛試庚傳勝塵容難耐閒

情非舊有無限好景低徊拌只向蒲團消受可憎一豎尋
人攬著吟魔按住呼盧手嘆眼前兒女昔人貪長祝來富
貴於吾何有強起捧金卮揮淚眼含笑爲親壽幸妝成稚
髻操作前來梁鴻有婦 去歲一葉扁舟正此日襍被瀟
湘口楚巫喧蠻鼓賽對景幾回搔首敗擇驚風今日團圓
豈偶也被似水流光似夢前塵愁釀成衰醜任飛揚跋扈
薦肩火色流連落拓婦人醇酒且莫負名山論事業尙有
今而後問春到誰邊門前凍柳

虞美人 吳淞道中

吳淞江上行人去細雨征帆驚此時無限是離心卻似五
湖烟水萬重深 鷗居一舸今何處徙倚烟花暮消沈吳

苑太匆匆只在前溪一曲棹歌中

沁園春

閨門夜泊遇鄭十一卽席有贈

君來維揚我來毘陵相逢古吳正水槎鴨綠剛搖畫艇
浮蟻白飽貯金盃柳結同心花開異地紅燭題詩與有無
君須飲看吳宮走鹿越榭啼烏青衫失路唏噓剩詞客
江東老鷓鴣歎絮雖泥染因風思起灰非心死向暖還蘇
帳底清歌樽前白髮醉矣還教紅袖扶明朝事且歸須緩
緩唱莫烏烏

減蘭

題鄭濯夫圖照

千年風葉四面秋聲聲撼撼窈窕冥冥如此林嵐大有人
一株枯樹是我十年吟斷處展卷沈吟觸起聞雞五夜

心

酷相思

春暮

猶記去年寒食暮曾共約桃根渡算花落花開今又度人
去也春何處春去也人何處如此淒涼風更雨便去也
還須住待覓遍天涯芳草路小舟也山無數小樓也山無
數

昭君怨

門外月明如晝窗內一燈如豆何物影空梁水雲光忽
聽遠鐘微度又被曉風約住此際惱閒情是浮名

鳳凰臺上憶吹簫

洪稚存悼鴛女和韻廣之

來是何心去耶真幻爲他放下簾鉤算浦珠初孕嵐黛旋

收略似一灣新月初生也即便難留惆悵處紅茵繡襪觸
眼成愁 休休西風又起早一葉梧桐吹下高樓莫聽簫
午夜挑斷銀篝擺脫紅塵浩劫彭殤盡一樣荒邱休頻憶
經春鶴夢總付悠悠

蘭陵王

十六夜借雅存泛月溪上次韻

清光足卻似君才萬斛把琴樽挈下扁舟拂袖凌風入空
廓一更天似沐兩漿亂衝寒玉展眼處枯木蒼葭古意茫
茫墮高閣 慙慙杯共屬歎錦瑟年華幾時堪復姮娥此
景休相促待五岳游過九州閱遍者回攜手白雲宿禽魚
共徵逐 滅燭湖寒綠漸鐵笛將殘葛衣嫌薄一聲歸櫓
空林角倘此閒無爾今宵少僕城南明月可也悽慘孤獨

鵲踏枝

寄龔梓樹

記得去年寒食暮細馬輕衫花裏揚鞭去一路樓頭招袖
語銀箏彈遍蕭郎句 三五冰輪簷際吐爲問驚烏今夜
棲何處兩地相思無一語燕南趙北多紅樹
幾度鍼詩愁共寄望斷樓頭不見雙雙鯉常是故人書一
紙手香三載畱懷裏 我亦飄零無定止君贈梅花莫問
江南使日暮紅塵飛又起天邊何處無歸騎

采桑子

虞山旅舍送雅存歸里

荒雞喔喔山鐘歇醉也麼哥睡也麼哥酒味爭如別味多
送君歸去吾仍客歸意如何客意如何雁叫霜天月浸
波

念奴嬌

虞山旅舍夜起是日稚存歸里

迷茫烟樹算離腸
曾斷幾回南浦
遮莫九龍山下
月今夜是君行處
一葉舟輕
片帆風飽
欲往何能住
憑君孤棹引
吾鄉夢歸去
夢到阿母闈前
須與復向高館
和君語
此際烏啼
星作作涼露
碧天如水
好事纔圓
羈鴻又唱一枕
瀟瀟雨
蘭缸細剔
淒淒城上更鼓

醉春風

幽約

望斷青鸞信
寂寞瑤階冷
昨宵已下死工夫
肯肯裊盡
爐烟敲殘
棋子移來花影
懶步挑釭
燼珠斗斜
還整柳梢
月上已三更
等等憶著幽歡
縱教沈醉也應驚醒

減蘭

中秋夜感舊

露濃烟重一陣衣香
何處送倚
遍回廊
九曲欄杆
九曲腸
去年今夕
木犀花底
曾相識
此夜花前
只有清光似去年

相思誰說
水晶簾外
朦朧月
憎煞嬋娟
偏對樓頭
作意圓
綺窗人靜
露寒今夜
無人問
廿四橋頭
一曲簫聲
何處樓

蝶戀花

我是揚州狂杜牧
似水閒情
占得烟花
目酒醒
月明花
簌簌小紅樓
上春寒獨
猶記綠陰
深處宿簾
捲東風
重把幽期
續淚眼
細將紅豆
囑那人家
住雷塘曲

醜奴兒令

春夜

春陰底事濃如結半是離愁半是春愁釀得廉纖雨一樓
霎時雲散天如洗月似銀鉤涼似新秋嫩綠池塘溼未
收

珊珊弱骨臨風倚遮莫衣單况是春寒一半憐伊不忍看
欲行乍卻羞眸睇背立欄杆偷整雲鬟半臂輕涼露未
乾

減蘭 登吳山遇雨

亂山無數試問春歸歸底處天際鷺毛一髮錢塘暮雨潮
雨來江市黯黯半天雲掛地白鷺飛還片片輕舟盡落
帆

滿江紅 題岳仲子鄂渚吟詩後

老子當年曾幾醉南樓夜月但慘淡獅兒霸氣斷戈沈戟
一片武昌秋柳綠三更鷓渚寒濤急問扁舟誰叫落梅風
聲聲笛 高宴會西園集狂嘯傲南州客向殘山剩水射
棚行炙安樂宮門無片瓦呂蒙城畔餘殘堞想先生憑弔
日登臨悲秋極

鄂國王孫認一片精忠餘烈想當日偏師背水旌旗獵獵
帳外濤衝猿鶴警軍中夜冷魚龍寂到而今急雨打空江
猶嗚咽 沈不盡橫江鐵燒不斷臨江壁儘茫茫古意亂
填胸臆十載雄名畱幕府興酣如此方搖筆把新詩點染
舊江山都生色

僕本狂奴頻掩卷壯懷陡發翹首處大江西上暮雲明滅

樓上有人題健句鄂中自古生詞客算浮生何日駕扁舟
衝雙屐 高吟罷雞聲歇獨酌倦殘缸沒忽天風吹夢長
鯨噴雪下界霜鐘催去急倒看萬頃蘋洲白鷺驚回風雪
鎖巖城空淒切

虞美人 奔

昨宵博塞今宵弈曲院雲屏隔月明猶界粉窗梅只此春
宵一局不須催 金杯碎玉敲還寂覓箇中心劫心知負
了暈紅腮忽地笑拈雙子倩郎猜

疏影 秋思

塵衣初典卻一番商信吹下空館半枕還鄉裊作輕雲隔
斷楚天來雁請看十萬江南戶只一夜秋聲都遍作朝來

微雨簾纖失卻越山數點 尚有濛濛遠樹捲湘簾細認
烟水無限畫艇溪橋幾陣金風流出敗荷一片小橫塘唱
愁眸睇正賀老臨風瘦減忽低頭瓜果筵前孤負深閨歡
燕

滿江紅

京口感懷寄洪大稚存左二仲甫

蒜嶺西頭曾醉過幾場明月屈指算經年抱恙三秋作客
白浪驅人貧有效西風剗夢愁無跡到江山勝處忽悲來
頭堪白 萬里下岷峨雪千古瀉英雄血只茫茫入海無
聊之極二十年來堪悔事一聲山寺霜鐘歇問南徐風景
近何如歸來說

點絳脣 春宵

集七

宿酒初醒閒情似水和腸軟細雨三更簾外春陰捲一
樹梅花落向閒庭院無人管冷風過處點點春愁糝

前調 雨霽

瘦骨無情年年此際懨懨病小立風前討箇傷春信 淡
月微雲作出春宵景斜還整斷無人處卍字闌干影

浪淘沙 幽會

連日愛新涼更短更長昨宵沈醉甚心腸百樣溫柔呼不
起裊盡爐香 今夜醉柔鄉且費商量和衣霍地倒銀牀
不合郎來偷一覷漏了春光

前調 懷閔季心

交識滿浮生健者惟卿憶從相識在蕪城一揖四筵皆失

色氣是幽并 荷戟靖邊庭歸去呼鷹生憎脆管與繁箏
箭叫一聲雕落地笑絕冠纓

前調 洪對巖

古渡白雲封今雨樓空我歌紅豆恨重重纔出新詞君拍
手花底相逢 驪唱各匆匆流水西東馬頭細草又春風
檀板金樽山月曉懊煞吳儂

前調 徐芸圃

人靜露溥溥別意闌珊桂花庭院捲簾看今夜月明應夢
我同倚闌干 頃寄見懷詩云今夜月明
應入夢桂花庭院捲簾看 世味各鹹酸工
到愁難風前玉立瘦無端只恐夜深應化作幽蘭

如夢令 曉遇

集十七
細雪乍晴時候細水曲池冰皺忽地笑相逢折得玉梅盈
手肯否肯否贈與一枝消酒

聞說玉郎消瘦底事清晨獨走報道未曾眠獨立閒階等
久寒否寒否剛是昨宵三九

一陣雀聲噪過滿院沈沈人臥此去是書齋只在春波樓
左且坐且坐我共卿卿兩箇

一抹蓬鬆香鬢繡帶縮春深淺忽地轉星眸因甚紅潮暈
臉不見不見日上珠簾一綫

沁園春 夢斷

裊若輕烟疾若驚鴻噫嘻怪哉正幽幽咽咽鴟啼古屋淒
淒楚楚月冷窗梅幾載相思連宵入夢今夜銅環風動開

聞說道有千重巨浪萬頃驚雷 如今雨打風吹只一點
殘燈未死灰倘飄零重訴卿應有恨蛟龍未醒僕願相隨
去是何心歸還底處鶴唳橫空到枕來高樓外有荒雞喔
喔戍鼓哀哀

醉花陰 春困

錦幕輕風吹又動放去惺忪夢生怕捲珠簾尺五春陰壓
得眉尖重 滿院姊歸花外唳測測寒飈送昨日上高樓
南北東西芳草何曾空

千秋歲 花朝

花朝到了扶病披衣早春只半愁先老數聲風共雨一片
烟和草閒情似游絲一縷空中裊 牒報東君道蜂蝶休

相擾別來久依然好一杯爲汝壽千萬君應保休只似年
年歲歲教人惱

鶯啼序

鄭誠齋先生招集白雲菴周幔亭圖爲小冊分賦用曹以南韻

童子何知解領略溪山詩酒也繾綣折柬招來追隨許附
塵後疊嶂忽嵌高閣聳巉磯怒拍江聲吼只畫圖深處幾
箇閒人消受兩袖空中長襟風際眞箇雲生肘認微茫
城西十寺疏鐘飄度溪阜界隨青眼放時寬情到醇醪傾
處厚忽清談天外吹來霏霏璫玦書生此際頓露昔時
狂態幾曾言擇口更十五雲郎喚向尊前歌聲清瀏幔亭
有小
僅善客解吹簫有客施姓者郎能顧曲曲皆幔
亭自製當筵相對
移情否問此樂天涯幾人有閒情豪興一齊迸向吟腸難

按處傾一斗夜云深矣飽酌金罍四座交相壽待到歡
闌綺席推起山窗明星欲滴蒼烟如糝堤邊燈火酒人歸
去數聲爆竹千山響更深潭驚起蛟龍走者般高會曾逢
他日溪山多應不朽

木蘭花慢

月下登虞山哭邵叔山先生

君來因底事今依舊主芙蓉空廿載經窗半生閨苑名落
寰中只何故奪君恁早詎天心眞箇忌才工萬里月明慘
慘五更海霧濛濛九原休恨別匆匆天上更相逢待鶴
唳歸來鐘鳴蕭寺影落青楓今宵故人來此問吟情可與
舊時同干點淚珠零雨數絲霜鬢臨風

人閒呼殆遍君似醉也應醒但枯樹黏天浮雲掛地有影

無形痛一點墓門紫火空嘔將心血誤浮名一自子期去
後曲終江上峰青 南沙城枕向湖濱曾約共登臨怎芒
屨來時青山有恨流水無聲此閒玉霄不遠叩天關風雨
泣山靈千載仲雍言偃一般蔓草荒城墓皆在虞山

風流子 前題

余年剛弱冠曾飲博慣縱狹斜場幸北海尊前容吾跌宕
東山座上恕我疏狂相將久庭前逢玉樹帳後識諸郎綠
酒黃花時陪歡讌風晨月夕每話行藏 其閒頻離別空
江明月野渡清霜幾度詩緘遠道辦祝名香詎半生落拓
天憎遇合數行風雨碑斷文章一夢蟻窩醒也萬古斜陽
哲人今萎矣算百歲齒髮未凋殘怪庚子日斜妖禽有驗

龍蛇歲在惡夢無端倪望處微車來地下丹詔別人閒講
院歸來半牀書掩夜臺吟罷數杵鐘闌 楓林紅于血荒
岡淚灑萬樹齊殷下有纍纍古塚不辨何年想先生當日
也會憑弔此時弟子空哭青山月落屋梁時候想見蒼顏

風馬兒 幽憶

子規窗外一聲聲把醉也醒醒夢也醒醒細憶別時情狀
忒分明盈盈 夜長孤館更清清把鐘也聽聽漏也聽聽
直到五更斜日落疏櫺冥冥

鳳凰臺上憶吹簫 秋感

試望平原悲哉氣也人閒無處宜秋被幾番哀樂白了人
頭休道虎頭燕頤誰曾望萬里封侯空惹下一天憔悴半

世恩仇 漂流殊自悼口歎人皆欲殺我定何尤只風聲
鶴唳聽也都愁堪笑百年終盡瀛州遠大藥難求聊自廣
逍遙齊物隨化悠悠

南浦 泊鎮海

蛟門中劈看天邊一葉破空來又向斷磯荒嶼泊入浪花
堆多少鸞帆蜃雨和龍吟夜半似驚雷更颺風驟起含腥
帶溼白日冷於灰 此地孫盧戰後警烽烟幾度海門開
還笑建炎南避君相總信才回首亂鴉殘堞聽沈沈戍鼓
有餘哀嘆蕭條身世海天空處獨銜杯

水調歌頭

仇二以湖湘道遠且憐余病勸勿往詞以謝之

一事與君說君莫苦羈留百年過隙駒耳行矣復何求且

耐殘羹冷炙還受曉風殘月博得十年遊若待嫁娶畢白
髮待人不 離擊筑驩彈鍊粲登樓僕雖不及若輩頗抱
古今愁此去月明千里且把離騷一卷讀下洞庭舟大笑
揖君去帆勢破清秋

金縷曲

勞瀛叔手書大悲咒以贈云誦此可卻一切魔障報之以此

落魄吾之分歎年來病魔窮崇公然作橫君說驅除真易
耳此事吾能為政論慧力圖澄堪證一卷貝多魑魅避更
波濤可與蛟龍逆還說與堪續命 檀那衣鉢何曾吝更
兼他雄詞辟瘴光芒難近時有贈詩此去天南山鬼哭脫卻女
羅逃盡更鑿險降魔杵奮云曾有讀者見天神隨護只恐夜深驚屈宋
月明中難把騷魂認一長笑謝君贈

前調

仇麗亭邀飲吳山卽用前韻

飲啄皆吾分笑年年屠門大嚼老饕太橫脫帽翻尊狂不
減管甚森嚴酒政問療倒霜毛作證賤子胸中饒塊壘儘
枯腸甘與槽邱迸任百罰諸公命 緒言領畧何曾吝聽
懸河分棚對壘詞鋒難近忽忽臨風來苦語此地一杯須
盡更鯨吸爲君重奮別意酒悲渾不辨待重來再把吳山
認雲海誼好投贈

滿江紅

贈王桐巢

何物書生曾躍馬炎天雪窖論家世過江檠戟文章忠孝
蕉鹿幾番驚往事關山若箇常年少更飄零一夢落青樓
從頭覺 湘月落青猿笑楚天闊哀鴻叫把離騷痛讀千

秋同調好賦十年畱恨別雄心獨夜歸屠釣訂他時書卷
換漁蓑吳淞棹

齊天樂

二月十三夜宴汪笛舫宅

楚天一夜東風到吹綠萬家烟井新燕樓臺早鶯門巷寫
出異鄉風景歌筵坐穩算年盡逢丁夜將達丙紅燭如山
唱澈金元院中本 主人好客絲難繡看紛紛投轄重門
鑰冷切切鷗絃淵淵羯鼓不醉教人怎肯當杯猛醒道此
是天涯陶然滿引檀板驚飛笑山禽村甚

時余酒
困先逸

換巢鸞鳳

十四夜宴王崑圃宅

日煖新晴正柳青客舍花放春城南樓裙屐滿西閣管絃
盈主人談是過江清口雜四座齊諧楚聲聽歌忽似一縷

游絲初定 夜靜孤月正銀燭光寒中酒人微病趙魏謀
歡應劉作劇意氣公然豪橫算二十年幾會逢再三千里
吾何恨鞚歸鞭有輕塵把馬蹄襯

氏州第一 花朝

昨夜狂風拔木發瓦五更大雨而止一睡膏騰醒來獨怪
嫩日軟陰如水莫道春猶淺青上柳梢來矣猛記今朝百
花生日舊愁提起 猶憶去年曾懺汝口繡佛旃檀香裏
一喘吟魂廿番花事薄福都如紙昔時風亭月榭曾消得
幾遍彈指且掩重門任戶外剪紅揉紫

虞美人 春風

連晨驟暖春衣脫一雨寒幾雪舉杯長笑問天公作盡炎

涼何必在春風 晚來孤館苔痕閉冷冷清清地小窗破
紙本無多吹過廿番花信更如何

七娘子 山行遇雨

一鞭裊入千山裏樵歌洗胃鶯鍼耳忽露青帝低飄竹塢
典衣爛醉今朝始 孤村流水桃兼李此間小住真佳矣
似有風來驟聞澗響子規啼處春陰起

摸魚兒 寒食漫興

夢驚回今朝冷節天陰難得窗亮弄晴作雨春無賴不管
有人惆悵休惆悵猶喜是天涯對酒人無恙酒杯莫放算
落盡辛夷將飛柳絮好把碧欄傍 鄉園樂今日榆羹花
釀錫簫吹煖門巷歲歲風前悲蕩子愁煞棠梨鬼唱登樓

望問風景江南半點何曾像離波新漲但芳草天涯遠山一角不語黯相向

憶秦娥

湖天闊清湘望斷三更月三更月猿聲是淚鵲聲是血曲終數點烟鬟沒此間自古離愁窟離愁窟幾叢斑竹臨江猶活

百字令 登益陽城樓

桃花江上向西風落葉敲樓孤凭尚有秦時明月在縣爲秦建黯黯蠻山相映桂郡南連零陵西拒地制湘東命幾多蝸角紛紛蠻觸爭迸當日赤壁功成左將軍作事將毋太橫從此孫劉誇割據我笑大言子敬故壘千秋土山一帶

想像軍容盛耕民可見苔花敗鐵遺賸

水調歌頭 岳陽樓

豈是夢中到始覺楚天長軒皇張樂去後太古別離場一曲湘靈鼓罷再聽汜人歌盡天老月荒荒十二晚峰碧萬里瘴雲黃龍鎖脫蛇骨斷蚌帆張陰陰一片腥起微帶酒花香不用憑軒流涕只要朗吟飛去倒影落瀟湘揮手謝時輩千載定還鄉

霜葉飛 湘江夜泊

倩誰爲問瀟湘水綠何一碧能爾自從葬了屈靈均只想成烟矣不信道騷魂未死月明淒苦猶如此算地老天荒那一角蒼梧野外多少山鬼我欲寸磔蛟龍將君遺骨

捧出萬丈潭底請看往日細腰宮是一堆荆杞又恐惹衝
冠髮指問天呵壁從頭起還伴他□□□霧鬢烟鬟一雙
帝子

洞庭春色

登黃鶴樓

爲問司勳誰家樓也而汝題詩算吾宗老輩子安去久玉
京舊侶叔瑋來遲今日我遊因薄譴看城郭人民半是非
還聞說又吳宮楚館電捲星移 千年謫仙又去空傳語
天上相思望三湘七澤無邊水氣荆門郢樹一片斜暉只
有此樓常不改與江漢茫茫無盡期歸與好把落梅短笛
鶴背橫吹

南浦

江口夜泊

蒼茫葭菼聽西風夾岸響騷騷身是洞庭一葉流下漢江
皋莫問殘山賸水歎興亡一半屬孫曹共細腰池館章華
臺殿一樣草蕭蕭 何處數聲蘆管隔江沙人倚水蘭橈
多少倚篷心事天外水迢迢寂寞郢中白雪悵騷魂千古
□難招且扁舟歸去五湖三泖任逍遙

